

SEEMAHALE



Ke a leboha, Moena Outlaw. Ke u leboha haholo.

Lumela, motsoalle. Eo ke... Ehlile ke ananela kananelo e ntle eo ka Moena Outlaw, 'me mofuthu o utloahala lipakeng tsa rona. 'Me ke thabetse ho ba mona tabernakeleng ena bosiung bona, ho khutlela mona Phoenix, le ho mamela lifela tsena tse monate le k'hoare ena e nyenyane e ratehang. Ke ne ke li shebile hohle. Ke nyatsa kamoo batho ba bang ba etsang le ho apara matsatsing ana a qetelo, ke batla ke tsota sehlotšoana sena sa basali ba lifahleho tse hloekileng holimo mona. 'Me e bonahala e le ntle ho 'na. 'Me ruri kea ba lebohela. Molimo a ba hlohonolofatse.

2 'Me ho Moena Outlaw le mora oa hae, ke sa hopola mehleng ea ka mona, moshanyana e ne e le mothoana feela. 'Me joale ke enoa moo a leng teng, ke nahana hore o nyetse 'me mohlomong o na le lelapa. 'Me hoo ho supa ho sa nke nako e telele ho e phethisa, ha ke re? Ruri re ntse re ritsa re theoha ka tsela. Empa re shebeletse ntho e le 'ngoe e tlotlehang, mohla re tla bona Morena oa rōna Jesu, 'me ke mohla bohle re tla fetoloa.

3 Ba itse Khaitsemi Waldrop o mona bosiung bona, mosali eo ea folisitsoeng mofetše. Ke bitsitse lebitso la hae bosiung bo fetileng. O hokae? Na o teng mona ka mohahong joale, joale? E, Khaitsemi Waldrop, eya, le Moena Waldrop hape. Ruri re thabetse ho ba le lona tšebeletsong bosiung bona. Kea kholoa ke bona Moena le Khaitsemi Evans ba tsoang Macon, Georgia, ka letsohong le letšehali mona, ho tsoa koana Macon mona.

4 'Me—'me moenanyana enoa oa Mogerike ea lutseng ka pele mona, ha ke hopole. O tsoa hole koana Gerike, ha se khale ha ke kopana le eena. 'Me Eddie, ke a lumela, na ha e joalo? Kapa, na ke... [Moena o re, "Dave."—Mohl.] Dave, David. Ke ananela Bibe le eo, le lintho tse joalo, tseo u nthometseng tsona haufinyane, buka eo. 'Me ke u leboha haholo, moena.

5 Le metsoalle ea rōna e mengata... Sehlopha se seng se teng se tsoang Georgia, Moena S. T., kea 'mitsa, kea kholoa, kapa T. S., ka lehlakoreng *lena*.

6 'Me ke ile ka thabela ho bona moshanyana oa Moena Williams. Ke hakae a nkopa ho mo rapella, le ho mo utloa a ema holimo mona a paka joalo bosiung bona, ka sebele e thabisitse pelo ea ka, le 'na—le hona, bakeng sa seo.

7 Ho kena, ka kopana le Moena Mc Anally kantle mono, motsoalle oa ka oa khale. Ke 'mona mohlomong nako le nako ha ke theohela mona.

Metsoalle ea rōna e mengata feela mona.

⁸ Ho utloa bopaki bo tsoang lipholisong, ho 'nahanisa ka sena. Metsotsong e 'maloa e fetileng ke letselitse Moena Tommy Hicks, ea leng Washington, kapa Oregon, ke rialo. A batlile hore ke tl'o mo ema sebaka vekeng ena. Moena oa hae, le ngoetsi ea hae, le lelapa lohle, ba bolailoe hang-hang thapameng ena, tlase Mexico. 'Me o lokela ho theoha ho tseba moena oa hae le ho etsa litlhophisso tsohle joalo-joalo. 'Me ruri ke utloella Moena Hicks. Nkile ka tlameha ho etsa hona hoo, liveke tse 'maloa tse fetileng, ka 'mè oa ka. 'Me ke a tseba hore o ikutloa joang. 'Me ka hona, ke a lumela, nakong ena, ka ha bohle re kopane re le sehlopha se le seng se seholo sa batho ba Bakreste, ke lumela ekabaho botle haholo ha re ka inamisa lihlooho tsa rona motsotsoana le ho rapella matšelisio a Moena Hicks horeng ena.

⁹ Ntata rona ea Maholimong, re tliša ka pel'a Hau joale, re le sehlopha, sehlopha sa batho e leng bajaki le baeti, bafeti, ba ipolelang hore lena hase lehae la rona, re baahi ba 'Muso o mong o moholo o tlang ho tla, etsoe Jesu a re rutile ho rapela, "Muso oa Hau o tle. Thato ea Hao e etsoe." Ntate, bosiuung bona, e mong oa baena ba rona, Moena Tommy Hicks, mohlanka oa Hao, masoabi a chalamelitse mehaleng mehalala ho fihla litsebeng tsa hae. Moena oa hae ea ratehang, ho lumela hoba e ne e le moshanyana ea sa pholosoang, le mosali oa hae, le ba banyenyane, bohle ba sa tsoa timetsoa kajeno ke kotsi ea koloi. 'Me moena oa rona o moeeng joale, o fofa ho kopana le setopo sa moena oa hae ea ratehang. Ke rapella Moena Hicks, Morena. Ke rapela hore Moea oa Hao o be holima hae le ho mo thusa. Mo tšelisise. 'Me letsoho le lehola la Molimo o phelang le ke le nanabele 'me le mo fe mohau o tšehetsang horeng ena. Ke utloa maikutlo a hlabang, Morena, liveke tse 'maloa tse fetileng, ntho e tšoanang e etsahala, 'me ke mo utloela bohloko. 'Me ke rapela hore U tle u mo tšelisise ka tsela tsohle tseo U ka li khonang, Ntate. Re kopa sena ka Lebitso la Jesu. Amen.

¹⁰ Li ngata lintho tse ka buuoang, nakoana e nyenyane haholo ho li bua. Re masoabi haholo bosiuung bona, ha batho ba eme ka hare, kante, le pel'a mabota a kereke.

¹¹ Joale, vekeng ena e tlang, Labone le tlang ho qala kopano holimo mona Ramada. Ke lumela hore ke qapolisitse seo hantle. Holimo ka letsohong le letona la West... kapa East VanBuren Street. 'Me Ramada, e batla e le holo e kholo mono e sebaka se lekaneng ho lulisa batho ba likete tse peli le makholo a mahlano. 'Me ebile monyetla o moholo ho 'na ho mengoa mona ke Full Gospel Business Men's Fellowship, etsoe ke buile, ka bophara ba lefatše, bakeng sa bona. 'Me ba 'memile sebokeng sena, Moena Williams, le mopresidente oa khaolo ena mona, le banna ba bangata ba khabane.

¹² 'Me re lebeletse nako e kholo holimo mono, 'me ho tla fihla libui tse ling tse khabane, ha ke utloisisa, tse tla ba teng mono. Kea utloisisa hore e tla ba monyetla oa ka o moholo ho bua lijong

tša hoseng tša Moqebelo hoseng. 'Me haeba ho le joalo, ke batla ho bua ka temana: *Monna Ea Mobe Ho Fetisa Eo Nkileng Ka Mo Fumana*. Ka hona . . .

¹³ 'Me Sontaha thapama ke tla bua hape, ho bua le sehlopha sa balumeli mono Sontaha thapama. Veke eohle ke tla tloha kerekeng ho ea kerekeng, kerekeng ho ea kerekeng, ka nako e 'ngoe habeli ka letsatsi, ho etela baena ba ka. 'Me ruri ke e nka e le monyetla, metsoalle, ho kopana le mekhatlo e fapaneng.

¹⁴ 'Me mona, nako e fetileng, ena e ne e batla e se khonahalo, ho kopanya batho ba mekhahlelo le mekhatlo e fapaneng. Empa Molimo o babatseha haholo. O joalo. O sa tsoa e sebetša hore bohle joale ba qale ba kopane hammoho, 'me ba lebala liphapano tša bona tse nyenyane, 'me ba hatela pele nqa pheo ea Pitso e holimo. Ehlile ho lokile. Ke leboha Molimo haholo, ho bona seo. 'Me joale e tsoelepele ho hola, ke thapelo ea ka.

¹⁵ Moena Outlaw, o sa tsoa bua, e le oa pele ho 'memela Phoenix. Ke tšile koano lilemo tse ngata tse fetileng le Moena Kidson, 'me ra tšoara kopano e kholo. Kopano eo e ne e le mokolokotoane oa bohlokoa bophelong ba ka. Ba ne ba se na lihatisi mehleng eo. Ba ne ba e-na le sengoli se senyenyane sa molumo 'me ba rekota. 'Me ke ntse ke tšoare lirekoto tse tsoang kerekeng ea Moena Outlaw, le ho tsoa kerekeng ea Moena Garcia mono, k'hoaerenyana ea Spanishi e binneng ka Spanishi, joaloka ha tsena li etsa ka—ka Senyesemane.

¹⁶ 'Me hang ka nako ha re jeoa ke bolutu hae, 'me ke ikutloa ke le bolutu, ho bona batho, lea bona, batho ba koana Phoenix. Ke bulela rekoto eo 'me ke e letse, le a tseba. 'Me le . . . E se e batla e senyehile. Empa ke e tseba hantle haholo, hoo ke tsebang nako le nako moo e tlang ho tlola mola, le joalo-joalo, kahoo ke lula hantle feela le eona.

¹⁷ Ke fumane boiphihlelo bo bohloko haholo bophelong ba ka haufinyane, ka ho lahlehela ke 'mè oa ka, e ne e le mosali ea mosa haholo oa Mokreste. Empa ho tsamaea ha hae—ha hae ho ne ho potlakile. Ha ke na nako ea ho e bolela bosiuong bona. Kea batla, ho e 'ngoe ea likopano, borakefese bo bong nqa e 'ngoe, le kamoo Morena a nthomileng hole, hore sena se etsahale. O ile a mpha pono moo ke lokelang ho ea teng le hore na ho tla etsahala eng. Joale, tseleng e khutlang . . . 'Me monate oa ho shebella 'mè a fihla qetellong ea tsela, le ho mo tšoara liphakeng tša ka, kapa ka sephaka, le ho nehela moea oa hae ho Molimo, le ho bona mosali eo ea ratehang, ea tsofetseng, oa mohalaleli ha a tsoa, a sa khone le ho bua hape.

¹⁸ 'Me ka re, "Mè, na Jesu o sa ntse a bolela monate ho uena joalo ka mohla u neng u amohela Moea o Halalelang? Kea tseba, ha u khone ho bua. Empa haeba e le 'nete, tabanya mahlo a hau ka potlako." 'Me a tabanya mahlo a hae 'me likeleli tša theoha marameng a hae. 'Me a ikela ho kopana le Morena. Bosiuong boo

A tla ho 'na ka pono 'me a mpontša eena, kamoo a neng a le kateng lekhateng leo. Ha ke khone ho lesa ho mema batho ho hatellela nqa Seo. Lea bona? Ho beha . . . U seke oa fetoa ke seo, motsoalle.

¹⁹ 'Me joale, hangata, kamoo re emang kateng, ha re khaole motho ka baka la tsela eo ba lumelang ka eona, empa ka ho ba mopentekosta, le ho fumana boiphihlelo ba pentekosta, ke e bone e kena lelapeng leso, bao ba theohelang hantle pheletsong ea tsela, le ho ba shebella ho fihlela meea ea bona e tsoa. Kea le bolella, ke thabile haholo hore ebe ke bile le boiphihlelo boo. Ke . . . ho rua boiphihlelo ba pentekosta ka ho 'na. 'Me ke batla e mong le e mong a be le bona. Le se ke la e fosa. Leha u ka etsang, u se fose boiphihlelo.

²⁰ Ka tloaelo likopanong tsa ka, hohle moo ke eang teng, kamehla ke mabapi le ho rapella bakuli. Ha ke tsebe. E—e ebile katleho e khōlō. Morena o hlohonolofalitse, ho arabela lithapelo tsa ka makheto a mangata. 'Me kea ipotsa, pejana ke bua le lona, na ba teng ba tlileng ho rapelloa bosiueng bona, ntho e 'ngoe, ke tle ke fetole thero ea ka hanyenyane. U ne u tla rapelloa, ke ne ke tla bua ka taba e itseng ka pholiso ea Khalalelo. Haeba ho se joalo, ke ne ke tla bua ka ntho e 'ngoe hape. Na ho na le motho mona ho rapelloa, ea ka ratang ho rapelloa? Phahamisa letsoho la hau, ke tle ke fumane kakaretso feela. Hum. Khele! Be, ke loanne nako e ka etsang halofo ea hora, nakoana e fetileng.

²¹ Hela, ebile, na Billy Paul o teng mona, mora oa ka? Billy Paul, na u teng mona? Na u tsoere litlankana tse 'maloa tsa thapelo kantle mane? E-eang le late lethoana, ke sa bua nakoana, le li abe. Le a bona?

²² Haeba le sa etse, ka linako tse ling ba lula ba khutla le ho khutla, morao le pele, moleng joalo. Ha ho mohla u fihlang pheletsong ea eona. Yaa. Kahoo u . . . 'Me ka hona, haeba le tla ba le tse ngata hakaalo, re batla e mong le e mong oa bona, empa e seng habeli, le a bona. Re ke ke ra khona. Hobane, batho ba bangata mona ba tsoa hole. 'Me ke tla bua ka khutso metsotso e 'maloa feela ka ntho e tla leka ho thusa, le ho phahamisetsa tumelo sebakeng moo re ka rapellang bakuli.

²³ Le na le molisa ea khabane, le motlatsi oa molisa mona, lekhotla le babatsehlang, kereke e khabane, batho ba khabane.

²⁴ 'Me tsatsi le leng ha ke bua kopanong e 'ngoe kantle mona Phoenix, kopanong ea pele. Ke ne ke bua, 'na le mohatsa ka re theoha ka seterata, khele, ka moo phula ena e tlamehileng e be e bonahetse lilemo tse makholo a 'maloa tse fetileng, le chebeho ea eona kajeno.

²⁵ 'Me kajeno ra nka leeto ra nyolohela South Mountain, le holimo koana holim'a motse mono, kantle ho atmostere ea motse. Re ne re lutse mono 'moho re qoqa ka Morena, le kamoo A

bileng molemo ho rona. 'Me feela . . . Moea o Halalelang oa kena ka mosa o monate ka koloing. 'Me feela . . .

26 'Me ka sheba tlase phuleng moo 'na le Joseph e monyenyanane re theohileng, nakoana e fetileng, ha ke le mona. 'Me 'na le eena ra lula fatše mono, ra tsoarana ka matsoho, ra rapela, moshanyana oa ka. 'Me ka kopa Molimo, ha ke tloha, nke ke behe Bible ea ka matsohong a hae, 'me a lule le eona, le Lentsoe feela, 'me e tla ba monehelo ho Eëna ho baballa bophelo ba ka le ho nthusa.

27 Joale, ua tseba, ha u ka tloha! Rea tseba, metse eohle. Ke nahana hore Phoenix ke—ke toropo e babatsehlang.

28 Empa ka re ho mohatsa ka, "Nahana feela, tlase mono joale, hantle nakong ena, phula eo e nyenyane, Phula ea Maricopa mona, kamoo re ka shebang ho eona, Salt River, ho haola mona, ke batho ba bakae motsotsong ona, phuleng e le 'ngoe eo e nyenyane, ba tlaelang ka Lebiso la Morena! Ke libe tse kae, bohloa, le tse joalo, tse entsoeng horeng e fetileng, motseng ona, sehlotšoana sena sa batho!" Ka re, "U nahana hore batho ba sitiloeng metsotsong e leshome le metso e mehlano e fetileng, esale re lutse holimo mona motseng?" E nahaneng, bosiueng bona. Ka re, "Ho a makatsa ha Molimo a sa hlatsoe ntho eohle, ka mokhoa oo." Ka sebele ke 'nete.

29 Empa na le sa hopola joaloka Sodoma? Motho o ne a le teng tlase mono a tlameha ho ntšoa. 'Me ka re, "Moratuoa, ntle le tseo tsohle, hopola, hore phuleng ena esale re lutse holimo mona, thapelo e hlhile ka mora thapelo e tsoa pelōng e tšepehang. Ua bona?" 'Me ka re, "Ke lona lebaka leo re leng mona Phoenix kajeno, 'me likopanong tsena tse potolohang, kopano le baena ba rona, ke ho ipeha 'moho le bona, ho thusa ho suthisa mojaro ona o moholo, ho leka ho etsa hore ba bang ba bone."

30 "Joale, tsatsi le leng ke lumela hore phula eohle e tla hlakoloe. Lefatše lohle le tla hlakoloe, 'me ho tla fihla Lilemo tse Sekete tse kholo." 'Me ka re, "Bahlabani le bahale ba tumelo ba tla tsamaea hara lirapa tsa Molimo, ho se hlale ba tsafala, ho se hlale ba kula, mohlalithoko tsa thoriso li tlang sebakeng, Mangeloi a nyaretse fatše."

31 Ke hopola lesole le tlang hae ha le hlompheua, le a tseba, mose ho maoatle kapa ho hong, le kamoo batho ba bonahalang ba mo tlotla haholo hakana. Empa ke eng? Ke litlotla tse 'maloea feela seterateng, le ho letsoa ha literompeta tse 'maloea, kapa litloloko tse llang, 'me ebe o khutlela hantle feela mokhoeng oa khale.

32 Empa ka tsela ena e tla be e le Bosafeleng bo sa khutleng, kamoo e—e lithoko tsa Mangeloi li binoang, nakong eo bahlabani bana le basali ba bona le malapa a bona ba tsamaeang liparadeiseng tsa Molimo. Joale, eo ha se toro e itseng ea tšomo joaloka Keresemese Santa Claus. Ke 'nete, metsoalle. 'Me—'me

re lebeletse seo. Ke lebeletse, ka pelō ea ka eohle, ho be ho fihle mohla Kreste a tlang 'me re tla ema ka setšoano sa Hae mohlang oo, 'me botsofali ha bo sa tla ba teng.

Ho thoeng? Tloo hantle mona, Paul, ha u rata.

³³ 'Me lona ba batlang setlankana sa thapelo, a sa theoha, ho le fa setlankana sa thapelo feela, phahamisang matsoho a lona feela.

³⁴ 'Me kea ipotsa haeba e se ho kopa tlolo, na re ka fumana seletsi sena sa piano le k'hoaere ena mona ho bina?

³⁵ Be, ha re amoheleng letšoele, re kenye e mong le e mong ho eona, ha ba rata, ba bine *Haufi le Uena. Haufi Le Uena*. Na le tseba sefela seo? Lea se tseba? Mang le mang o a se tseba? *Haufi Le Uena*? Ho lokile.

³⁶ Sefela se itseng, ha re lumelleng k'hoaere ho bina se seng ke hona. Hoo, ke nahana ho ka ba molemo, ho lesa feela k'hoaere ho se bina. Hoo ho tla le lumella bohle ho khahleha ho nehela, ho fumana likarete tsa lona tsa thapelo.

³⁷ Moena Outlaw, na u ka tla koano hape, ha u rata, haeba e sa kōpa haholo, moena oa ka? 'Me re tla fumana k'horase e 'ngoe, kapa eng hape, e tsoang bathong. 'Me re tla toba ka kotloloho, kapele kamoo re ka khonang, nqa Molaetsa o mokhutšoane, le ho rapella bakuli. Morena a le hlohonolofatse. Rapellang k'hoaere e nyenyane joale, kamoo e . . . bohle ba ba ananelang. Lona batho ba pentekosta ba ananelang nthoana e monate, sehlotšoana, se shebahalang se hloekile sa banana le bashanyana ba joalo, phahamisang matsoho a lona feela. Lea bona? Ehlile re etsa joalo. Ntho e 'ngoe e tsoileng ka mahetla, lintho tse ngata tse tsoileng ka mahetla, mabapi le kereke ena mona, 'me, e 'ngoe ea tsona, ehlile ke libini.

³⁸ [Moena Billy Paul Branham o aba litlankana tsa thapelo, metsotso e ka supang, nakong eo k'hoaere e binang *Jesu Ke Motsoalle Oa Ka*, kapa, *Jesu U Tla Mphetisa*. Mookameli oa khoare a nto re, "Billy o itse ho binoe '*Ho Tsamaea*. . . ? . . .' Empa re batla ho bina sefela seo re se entseng bosiung bo bong. Ekare ha rea khona tsoela pele, ka ntho eo Labobeli bosiu, ra ba ra bina sefela sena, ka hona re tla se leka joale. *Ke Ne Ke Le Teng Ha Moea O Fihla*. Ba nang le Moea ba bakae?" Phutheho e re, "Amen." Motsamaisi oa khoare o re, "Ke ba bakae ba nang le Moea o Halalelang?" Phutheho e re, "Amen." Motsamaisi oa khoare o re, "Ka hona, *Ke Ne Ke Le Teng Ha Moea O Fihla*." K'hoaere joale e a bina *Ke Ne Ke Le Teng Ha Moea O Fihla*—Mohl.]

³⁹ Ke leboha Morena ka seo. Amen. Re leboha hakaakang ka phahamiso e ntle joalo ea moea! *Ke Ne Ke Le Teng Ha Moea O Tla*.

40 Joale, re motlotlo ka litšebeletso tsena, hape ke re, 'me joale re rapela Molimo ho folisa bakuli, ho pholosa ba lahlehileng.

41 Joale, le nthapelle. Joale, ha le kena, e batla e sa lebelloa, 'me ha re tsebe lithophiso; re kena re tsoa feela, 'me ka tsela eo, re utloa re sa etse sohle se matleng a rona bakeng sa Morena, empa re leka ho etsa sohle seo re ka se khonang molemong oa Hae.

Ka hona ha re inamiseng lihlooho tsa rōna hape joale thapelong.

42 Ntata rona ea Maholimong, ke bosiuong bona, ka lipelo tse tletseng teboho, ha re tobana le terone ea Hau, ha re tsebe seo thato ea Hau e leng sona, le seo re lokelang ho se etsa. Empa U tla re etella pele. U tšepisitse joalo, ka hona re a e lumela. Re U rapela ho bua le ba lahlehileng bosiuong bona, le ho folisa bakuli. Ithuele khanya.

43 Hlohonolofatsa kereke ena, re kopa hape, Morena. Hlohonolofatsa kereke e 'ngoe le e 'ngoe e motseng ona le phuleng ena, ho tle ho fihle mohla tšoloho e kholo ea Moea e theohelang holima batho bana bohle, hore batho ba tsoang libakeng tsohle tsa naha ba khobokane ho tla utloa Lentsoe la Morena.

44 Joale, re a elelloa, Morena, lebaka leo ka lona re ka thabang le ho bina lifela ke, pele, hobane re tllile ho Krete, re lumela hore O ne a le teng. "Hoba tumelo e tla ka ho utloa, ho utloa Lentsoe." 'Me ha re ntse re thabela ho bina lifela tsa moea, le ho bona Moea o tsamaea hara letšoele, joale O ke o fane ka Lentsoe le tla lokisetsa lipelo tsa batho tšebeletso e tlang, bakeng sa pholiso ea bakuli, le pholiso ea moea ea motho ea lemetse, kapa letsoalonyana le bonolo le tenyetsehileng, joaloka lehlaka le tetekiloeng. Re U rapela ho le matlafatsa bosiuong bona, Morena, le ho le fa setlolo sa Hau se folisang se tla fana ka pheko bakeng sa bohle, hore enoa ea neng a khelohile Tseleng o tla busetsoa Tseleng bosiuong bona.

45 Re tla boela re rapelle, Morena, ba likokelong, ba kulang hoo ba sa khoneng le ho fihla litšebeletsong. Re a ba rapella, re tseba hore le bona ba rata ho ba mona, empa sera se ba tlamme ka hoo ba sa khoneng ho tla. Molimo, abela tokoloho ea bona ho fihla kapele. Rea lumela e ngotsoe Lentsoeng, ho re, "Batho ba bitsoang ka Lebitso la Ka ba tla phutheha 'moho ba rapele, Ke tla utloa ho tsoa Leholimōng." Lebaka leo re nkang monyetla ona oa ho rapela likereke tsohle li sa phuthehile 'moho, hore U tle o utloe o le Leholimong 'me o folise lefatše la rona. Hona joale re ho kopela tlotliso ea Molimo, ka Lebitso la Jesu Krete. Amen.

46 Joale, ke utloela ba emeng, le maoto a khathala, ke tla potlaka kamoo nka khonang. Ke rata ho khutlela khetlo le leng Phoenix, moo re ka phuthang bohle 'moho, 'me re be le tšebeletso e monate, e telele, ea pholiso mane Phoenix, moo Morena a hlohonolofatsang ba bang ba rona. Ba bang ba rōna re bareri,

joaloka Moena Outlaw. 'Me bongata ba baena ba bang mona ke bareri. Ha ke moreri hakaalo. Ke—ke rapella bakuli feela. 'Me koana ha ho motho ea kileng a rera Evangeli haese ea ratang ho hlalosa maikutlo a hae ho batho. Ntho e teng ka eona, u rata ho e etsa. 'Me ke thabile haholo ha le tšile ho—ho utloa tlhahisonyana eo ke e tšoereng ka Eèna, le ho tšepa hore O tla etsa ho hong bosiung bona ho le pakela hore ke—ke le bolella 'Nete le ho le rata.

⁴⁷ Ke batla ho nka mohlolithero mona nakoana, ha Morena a ratile, ho tsoa ho Santa Johanne, khaolo ea 12 le temana ea 32.

'Me 'na, ha nka nyolloa lefatšeng, ke tla hulela batho bohle ho 'na.

⁴⁸ 'Me bakeng sa mohlolitherononyana, ho haha holim'a seo, ke rata ho nka mohlolithero oa: *Seemahale*.

⁴⁹ Ke ntho e sa tloaelehang haholo, e makatsang, ho bala mongolo o joalo, kapa ho bala Lengolo, ebe u nka mongolo o sa tloaelehang. Empa ke fumane lilemong tsa bosebeletsi, Molimo ka linako tse ling o fihla ka tsela e makatsang, linako tse makatsang, linako tseo u sa nahaneng, ho bua ka melaetsa eo re neng re ke ke ra nahana hore O tla e bua, ho sebelisa motho eo re ka nahanang hore ha a tsebisahale. Empa Molimo o sebetša ka litsela tse makatsang, ho phetha mehlolo ea Hae.

⁵⁰ 'Me seemahale, ehlile, bohle re a tseba seo seemahale se leng sona. Ke ntho e sehopotsoeng, e phahamisitsoeng, ho batho, ho sheba ho eona. Ke ntho e beiloeng ka pel'a lōna. 'Me Molimo o tšepisitse, ho Esaia, khaolo ea 5 le temana ea 26, hore, "Ho tla emisoa seemahale e le pontšo. Ho tla emisoa seemahale."

⁵¹ Motho ho theosa le mongoaha o tloaetse, e ka hare ho eèna, ho leka ho ithusa. Joale, eo ke tlhaho ea motho feela.

⁵² Joale, seo re lekang ho se etsa ke ho ala motheo oa seo re kopang Morena ho se etsa: ho folisa bakuli, le ho nehelana ka tšepo. 'Me u ke ke ua tsoa feela ua ba le tumelo ea ntho efe eo u sa tsebeng letho ka eona. U tlameha ho fumana ntho eo tumelo e ka itšetlehang holim'a eona pele.

⁵³ Mohla o ne o nyala mosali oa hau, o ne o loketse ho ba le tumelo ho eèna. O ne a tlameha ho ba le tumelo ho uena, pele u ka etsa lehae. 'Me u ke ke ua nka ntho e sa hlakang feela 'me ua ba le tumelo ho eona, hoba ha e ea netefatsoa.

⁵⁴ Ka hona ntho e netefalitsoeng ka ho fetesisa eo re ka beang motheo holim'a eona, bakeng sa tumelo, e ka ba Lentsoe la Molimo. "Hoba tumelo e tla ka kutlo, le kutlo ka Lentsoe la Molimo," hoba ke Lentsoe la Molimo.

⁵⁵ 'Me motho joale, erekaha a entsoe, esita le maemong a hae a oeleng, o setšoantšong sa Moetsi oa hae, Molimo. 'Me ka kutloisiso e 'ngoe ea lentsoe, ke mora oa Molimo, ea oeleng mohaung. O oele ho seo Molimo a mo entseng hore a be sona.

'Me maemong a hae a oeleng, o mo nea litholoana tseo ho leka ho etsa ho hong ho ikhutlisetsa sebakeng seo ntho e ka hare ho eèna e 'molellang hore o tsoa teng. Hobane, o a tseba hore ha a maemong a nepahetseng le joale, hobane o bona lefu, maloetse, le mahlomola, le lipelō tse robeliheng, le masoabi. O a tseba hore o ne a sa etsetsoa seo. Le ha ho le joalo, ho sa tsotellehe hore na o hole hakae le Molimo, ntho e teng ka ho eèna e 'molellang seo, ntho e 'ngoe ka hare.

Joale, motho o bopiloe joalo ka bonngoe ba boraro: soule, 'mele, moea.

⁵⁶ Joale, kantle ke 'mele. Menyako e mehlano ea 'mele oo, 'me tseo ke likutlo tse hlano, ehlile: bona, latsoa, ama, fofonela, le kutlo.

⁵⁷ Bokahare, joaloka peo e jetsoeng, bokahare ba eona ke ho kang nama ea peo, e leng moea. Menyako e mehlano ho seo, moo u kenang teng: letsoalo, le mohopolo, joalo-joalo.

⁵⁸ Empa ka har'a phaposinyana eo ke phaposinyana ea boraro, e leng moea. 'Me ke sona se laolang tse ling tsohle. Mochoporo oa eona o mong feela, 'me ke boithatelo. U ka amohela kapa oa furalla, 'me ke oona feela mochoporo ho seo. Haeba u amohela thato ea Molimo ka moea oo, Moea oa Molimo o nka sebaka sa 'Ona pelong ea hau le ho laola tse ling tsohle. 'Me ha u sa amohela Seo, sera se nka letheba leo 'me se a se laola. Kahoo e robetse ka mono.

⁵⁹ 'Me motho, ka ho bopjoa ka mokhoa oo, hoo ho mo fa e—e ntho ka ho eena e etsang hore a batle ho sibolla ho hong ka boeena. O leka ho etsa ho hong ho ipholosa. O batla ho tsoa ho eona, empa o batla ho e etsa ka boeèna. O batla ho iketsetsa tsela ea hae ka eona.

⁶⁰ Joale, o lekile litšibollo tse ngata. O lekile ho sibolla sena ka mahlale. 'Me nako le nako ha a tsamaea hara mahlale, o itšenya feela. Nako le nako ha mahlale a etsa ho hong, o a itšenya; mosili oa sethunya, le matla a athomo, le—le libetsa tsa nyutlelie, le makoloi, le lintho tsena tsohle. Koana, ka nakoana e a mo thusa, empa o itimetsa qetellong. Hobane o . . . Ke ntho eo a e fihletseng a sa le kahar'a ntlu ea bosebetsi ea Molimo, a leka ho etsa ho hong, ho khopamisa seo Molimo o se entseng, le ho se kenya mehopolong ea hae, le ho iqapela.

⁶¹ Joale, joaloka ha ke boletse ka motse ona, joaloka motse o moholo ona o motle mona. Hola toropo ena feela e . . . E ka ba ntle ho feta kamoo e neng e le kateng qalong haeba, batho ba Molimo ba ne ba ea holimō-le-tlase literateng, matsoho a bona a phahametse sebakeng, ba rorisa Molimo ka lelapa la bona le tsohle. Na Phoenix e ke ke ea e-ba setša sa lefatše? Empa, sebakeng sa hoo, joaloka metse e meng kaofela, ke ho bua leshano, ho utsoa, ho qhekella, ho becha, ho tsuba, ho noa, ho taho, bofebe. 'Me ke lephoka pel'a Molimo. Le a bona?

⁶² .Ka hona, le a bona, seo motho a lehang ho se fihlela, o e hlekemanya feela. A ke ke a ipholosa. 'Me o leka ka thuto, o nkile mocha oo, ho bona haeba a ke ke a rupella batho tsebong e pholosang ea Krete, kapa ho ipolokela tsebo, kapa ho etsa ho hong ka thuto ea hae.

⁶³ Ke ne ke bala tsatsi le leng ho—ho *Life* magazine. Moo, ba bileng le . . . ke a kholoa bongata ba lona le balile sengoloa. Moo, ba entseng ntho e ngoe le e 'ngoe joale mabapi le ho kopanya lielemente tse fapaneng, kapa lipokello, ho fihlela ba ka etsa bophelo. 'Me ba itse ba tla e etsa. Ba ke ke ba etsa hoo. Bophelo ke popo. Ka hona 'Mopi o mong feela, 'me ke Molimo. Ua bona? Ba ke ke ba khona ho hlalisa bophelo, empa o leka ho etsa hoo. Kea ipotsa e ka ba mofuta ofe oa sebopuo, haeba a ne a ka se etsa, hola se ne se tla futsa bohla ba motho? Ka hona le a bona a ke ke a etsa hoo. Ha e a etsetsoa eena ho e etsa. O hlolehile ka thuto. O hlolehile ka saense.

⁶⁴ Oa tseba hore o tsoa kae-kae, empa o batla ho fumana tsela ea ho khutla.

⁶⁵ Adama o hlile a hlalosa seo, motho oa pele holima lefatše. Hoba a iphumane a oele mohaung, a leka ho inkela hlalefo ea hae le ho betla tsela ea ho khutlela ho Molimo ntle le pheko. O lekile ho khutlela ho Molimo ntle le ho etsa e—e pheko, ho hong ho lefella libe tsa hae. Kamora hoba kotlo ea Molimo e be lefu, a leka ho khutla a se na pheko ea lefu.

⁶⁶ 'Me banna ba ntse ba leka ho etsa hoo, ho leka ho bopa borapeli kantle ho pheko ho bona. Adama a iketsetsa lesira ka mahlaku a feiga, ho se mali a tšolleloang lesira lena, 'me Molimo oa le hana. 'Me O bo hanne mohlang oo, 'me O tla lula a bo hana. Hobane, "Ha mali a sa tšolohe ha ho tšoarello ea libe."

⁶⁷ A ke ke a khutla feela. Hobane, kotlo ke lefu; 'me ntho e 'ngoe e tlameha ho shoa, ho lefa kotlo eo. Ka hona ekaba phapanyetso feela, kapa bohle re lefung haeba ho se phapanyetso eo re ka itšoarellang ka eona. 'Me motho, ka ho etsa sena, o itemohile a hloka ho hong ho itšoarella ka eona, seo a ka se isetsang matsoho, ntho eo a ka reng, "Ke eona ena. Ke e fumane. Ke a tseba hore ke eona."

⁶⁸ Kahoo, Adama, e le hore a tšoare ntho e itseng, a rohakanya lehlakulo la feiga ho koahela bofeela ba hae le ba mosali oa hae, empa a fumana hore seo a neng a se tšoere letsohong la hae ha se sebetse.

⁶⁹ Ho theoha le mengoaha re ka bala banna, hola feela re ena le nako. Ha re nkeng ba babeli kapa ba bararō ba bona, le hona.

⁷⁰ Ha re nkeng Nimrode. Nimrode o hopotse hona hoo. Ka mora moroallo, a elelloa hoba Molimo o teng O tla ahlola ba khopo, hobane ba ne ba sa tsoa tsoa moroallong oo. 'Me a tseba hoba ke sebe se entseng hore Molimo a timetse lefatše. Ka baka leo, ka ho tseba hore sebe hape se tla etsisa Molimo hona hoo, a leka

ho fihlella ntho e 'ngoe, ho etsa tora. Hore, batho ba mathele holimo leholimong ha ho ka mpefala mona lefatšeng, 'me ba phela leholimong; le ho khutlela lefatšeng, ho etsa sebe, le ho khutlela leholimong hape.

⁷¹ Joale, e bile mohopolo oa batho tseleng eohle, ho leka ho etsa sebe le ho phela lefatšeng, le ho ba Leholimong ka nako e le 'ngoe. U ke ke oa khona. U ke ke ua khona. Jesu o itse, “U ke ke ua sebeletsa Molimo le mamona.”

⁷² Lebaka leo re lumelang bosiung bona ho hloboha sebe ka botlalo, ho tloha ho sona. Ke chefu. U se ke oa tsoenyana le sona. U se ke oa se lumella ho hang. U se ke oa ikamanya le sona. U se bone hore u ka atamela hakae ho sona u sa etse sebe. Sheba hore u ka suthela hole hakae le sona. Ntho efe e bonahalang e tletse sebe, suthela hole le eona. U se amane le eona ka letho, ho hang.

⁷³ Ka hona, Nimrode, ka kelello ea hae e bohlale, o lekile ho sibolla sena. 'Me ha u ka hlokomela, haesale ho le joalo, haesale motho a boptjoa. Hore . . . Ha u ka latela lesika la bana ba Kaine, bohle ba fetoha boramahlale, banna ba matla, batei lefatšeng ka tšepe le patsi, le joalo-joalo. E ne e le lehlakore le bohlale, le masene.

Empa bana ba Setha e ne e le bafumanehi, balisa ba manku, ba ikokobelitseng.

⁷⁴ Joale, ho a tsoana le kajeno. Ba itšetlehleng holima machini a itseng aa entsoeng ke motho eo ba ka mo supang, ho re, “Ena ke eona. Ena ke eona,” ntho eo motho a e sibolotseng, ka boena. Ebe u fumana, haholo-holo, bao ke mofuta oo o lehang ho phonyoha pheko ea Mali ho khutlela Tseleng e nepahetseng.

⁷⁵ Joale, empa Nimrode ka mora nakoana kahong ea tora ea hae, Molimo oa lula maholimong 'me oa mo tšeha. 'Me o batlile a e qeta ka phethahalo. Ke batla hore le hlokomele hore o batlile a finyella seo a qalileng ho se etsa. Empa, eaba, hang feela, Molimo oa fetolela ntho ka nqa e 'ngoe, 'me ntho eo ea heleha. Ea fetoha lerole. Joalo feela ka foresekoto sa Adama sa lehlaku-feiga se fetohileng lerole, le tora ea Nimrode ea fetoha lerole.

⁷⁶ Eaba ho latela e mong, e leng Khosi Nebukadnesare, 'me a tla haha motse.

⁷⁷ 'Me ha u ka elelloa, ka linako tse ling meea eo e theohelang holima batho. 'Me letsatsi lea tla, 'me joale le atametse, moo Kereke ea Bokreste, Kereke ea Morena Jesu Kreste, e lokela ho baea semoea, hobane Jesu o boletse, hore, “Meea e 'meli e tla bapa hoo e ka thetsang le bona Bakhethoa hola ke ntho e ka etsoang.” Sera se mano haholo.

⁷⁸ Joale mo shebelle le Nebukadnezare. O hahile motse hantle ka se setšoano sa Leholimo, joaloka ha noka ea Euphrates e ne e phalla—e phalla pela terone. Joaloka Leholimōng, noka ea metsi a Bophelo e feta Teroneng, lirapa tse akhotsehang le ntho khutla

e 'ngoe le e 'ngoe hantle feela kamoo e neng e le kateng, pele, khele, mohla Abrahamama a neng a tsamaea, a batla Motse o joalo. 'Me haeba kelello ea hau e se ea moea, Satane o tla u foufaletsa lintho tsena, le a bona, ntho e batlang e tsoana le Eona, empa ha se Eona. Haeba e entsoe ke motho, ha e na thuso. Haeba e rekiloe ka Mali ke Molimo, ke 'Nete. Hoo, le a bona, ke 'nete. Empa, haeba e entsoe ke motho. . .

⁷⁹ Joale, o entse motse ona o moholo. 'Me hape rea fumana hoo, hape, a etsetsa batho setsoantšo ho se khumamela, 'me a tlisa borapeli ba setsoantšo hara batho. Empa hara tsona tsohle, ha hlaha mongolo oa mohlolo leboteng, leleme le sa tsejoeng leo ho seng motho ea ka le hlalosang haese moporofeta ea tletseng Moea ea neng a le hara bona. 'Me 'muso oo oa kena leroleng, hantle feela joaloka tora ea Nimrode le foreskoto ea Adama ea feiga, ka ho tsoana, hobane ke ntho eo motho a e sibolotseng. Ke ntho eo a neng a batla ho e etsa, ho bontša hore a ka ipholosa.

⁸⁰ U ke ke ua ipholosa. Ha ho letho leo u ka le etsang ka eona. U se u etselitsoe Tsela. U ke ke ua ipholosa.

⁸¹ Re ka thonya lintho tse ling tse ngata tse kholo tse ileng tsa etsahala. Haufinyane tjena, Fora, kamora Ntoa ea Pele ea Lefatše ba ne ba batla ho aha lerako la Siegfried holimo mono. 'Me ba tobisa lithunya tsohle tsa bona nqa Jeremane 'me ba re, "Joale, ha Majeremane a ka leka ho hlaha ka nqa ena hape, khele, re tla khona ho ba thiba, hobane mona re tsoere lerako ka lona re ka ba phoka." Ho bontša feela hore merero e entsoeng ke batho e ke ke ea ema, Majeremane a ba phelekanyetsa ka bohlale. Ba potela ka mora lerako lena la Siegfried 'me ba re, "Re ka ja, ra noa, ra phela bohloa, ho tantša, ra phela sebeng, ho etsa sohle seo re se batlang, hobane re sirelelitsoe. Re entse selo se tla re sireletsa."

⁸² Majeremane a pota hantle ka mora lona 'me a ba phothoma, le a bona, a pota ka morao. Hobane, ba lebetse ho hlophisetsa lithunya tsa bona, ho thinyetsa nqa efe kapa efe. Ka hona Majeremane a sirela lithunya tsa bona, 'me a potela hantle, ka morao, 'me lerako la Siegfried la heleha.

⁸³ Majeremane a fihla a aha lerako la Maginot. 'Me ba nahana, "Hla ma-Yankees a ka fihla mona, khele, re tla kena feela qhobosheaneng ena ea konkreeti, 'me re tla itokela." Ho etsahetse eng? Ma-Yankee ba fihla ka liqhomane 'me ba ba pshatla likoto. La heleha le ha ho le joalo.

⁸⁴ United States, ha se khale mona, ba hopotse ba ka tea sekepe seo ho seng batei ba bang ba sekepe ho se tea. E ne e bitsoa Titanic. Bosiung bo bong, ha se ntse se tšela leoatle ka mouoane oa lienjine tsohle tsa sona, 'me lihlopha li ne li letsa 'mino oa jazz, li o pheula. Hang-hang, oa fetohela ho *Haufi, Molimo oa Ka, Ho Uena*. Hobaneng? Se thutse mosifa o moholo oa leqhoa, sa phunyeha, 'me la pharola lienjine. 'me sa tebela tlase botebong ba leoatle. Hobaneng? Molimo ka letsoho la Hae le matla o bontša

lefatše lena hore le ke ke la tiea. Motho a ke ke a fihlella letho a le mong.

⁸⁵ Joale, kajeno, moferefere o moholo o teng, mabapi le libetsa tsa nyutlelie. 'Me re sebelisa libilione tsa lidolara ho leka ho nyollela motho khoeling. Ho tla thusa'ng hoba a palame khoeli? Ha ke. . . Joaloka ha ke buile bosiu bo bong, ha ke tsoenyehe ka ho finyella khoeli. Ke batla ho kena Leholimong, ka hona khoeli ha e hole ho lekaneng ho nthusa.

⁸⁶ 'Me eaba Marashia, a re, "Oh, re behile motho oa pele sebakeng." Ke hlile ke fapana le bona mono. Monna eo o kene sebakeng lilemo tse ka bang peli tse fetileng. 'Me re bile le E Mong sebakeng ka lilemo tse likete tse peli, a re hahela Lehae leo re ka tlang ho lona.

⁸⁷ Empa, le a bona, liphihlello tse entsoeng ke motho, seo motho a se fihletseng ho se etsa ka ho eëna, se ke ke sa sebetse.

⁸⁸ Joale re lekile ho ruta batho, ho fumana seo re ka se bitsang, "Sehlopha se khabane sa batho," ka thuto. Liseminare tsa rōna li rometse bareri sekolong, e leng ntho e ntle, le ho ithuta thuto ka puo e nepahetseng, puo, le tse joalo, le thutapuo e ntlafetseng. Hoo, moo sehlopha se khabane sa batho ba motse, bao ho thoeng ke bona, se seng se ka kena likerekeng tsena. 'Me re tlatsitse kereke ea rona ka hoo.

⁸⁹ Joale, ha ke lumele sehlopha sa batho ba maemo a matle se le teng ho feta batho ba Molimo. Le a bona? 'Me ha ho mohla Jesu a kileng a sebetse holima sehlopha se joalo mohla A ne a le mona. O ile ho batšoasi ba lihlapi, ba sa balang, ba sa rutehang, ba lithoto. 'Me ke sona seo A se khethileng. 'Me Molimo, hola feela u ka Mo utloisisa, O rata ho nka ntho eo e seng letho le ho etsa ho hong ka eona. Hoo ho paka hore Ke Molimo. Ha ho letho leo u ka ithorisang ka lona. O nka ntho eo e seng letho, ho etsa ho hong ka eona. Hoo ho paka hore Ke Molimo.

⁹⁰ Joale, re lekile ho e etsa mohlang oo ka mekhatlo ea malumeli. Ra nahana, mohlomong, hola re ka holisa malumeli a rōna. 'Me re entse'ng, ha re bopa mekhatlo ea malumeli a rōna? Etsoe, ho itoketse; ha ho letho khahlano le bona. Empa ntho eo re e entseng ka mekhatlo ea rona, re sa tsoa qala ho hohella mokhatlo oo, 'me ntho ea pele le a tseba ha rea sarollela moena e mong kobo e lekaneng ho iphuthumatsa. Le a bona? 'Me re ikarola ke hona. Le a bona? 'Me ka ho etsa hoo, ra hlalisa se seng har'a rōna, se seng se sa tlameha ho etsahala. 'Me re fumana hoo ho sa sebetse feela.

⁹¹ Lipuo tsa rona tsa bohlaefi, li itoketse, feela ekare nka e etsa. Empa seo ha se baloe mahlong a Molimo. Ke Moea o Halalelang. Ha ho mohla Molimo o kileng oa hlomamisa ntho e joalo. O rerile oa ba oa laela Kereke ea Hae ho ea bolela Evangeli. Evangeli ha e a hlalefa. "Evangeli ha ea ka ea tla ka polelo feela, empa e tlele

ka matla le ka liponahatso, lisupiso tsa Moea o Halalelang.” Ke sona se hlahisitseng Evangeli.

⁹² Ha se khale mona Chicago, sehlopha sa Full Gospel se epile kopano. 'Me ba kena sekolo se itseng se seholo sa Bibe, 'me ba fumana sebui se seholo sa hlalefo. 'Me ea phatlatatsoa hohle motseng, ka sebui sena se seholo se tsoang sekolong se itseng se seholo, ka lebitso le joalo, khili, le likharata tsohle qetellong ea lebitso, ho fihlela ba nahana hore ho tla ba joalo feela. 'Me eare ha matšoele a bokane ho utloa monna eo, eareha a ema ka morao ho moaho a apere sutu, kholloro ea hae e hetlile, le puo ea hae tlasa sephaka sa hae, ho nyoloha ho ea e hasa hohle sebakeng seo.

⁹³ 'Me puo, khili, e ne e le khabane. Ho se motho ea ka buang lentsoe kahlano le puo eo. E ne e phethahetse. Melao-puo e nepahetse. Likhato tsa hae le matšoaro a hae a sefala a ne e phethahetse. Ha a hoelela ho hang, ho holoketsa, kapa makoeba, joaloka bohlo ba rōna. Empa a—empa a . . . A hlahisa puo ea hae, ka bokheleke bo bokana.

⁹⁴ Empa a nahana, “Ka sehlopha sena sa batho ba sa balang, ke tla nyolohela mono le ho ba bontša ho bolela'ng ho ba moreri.” A pepile peta, a nyoloha, a ikhohomosa, a hlahisa puo ena. Empa a fumana e sa lule letšoele la mofuta oo hantle. Ea feta holim'a lihlooho tsa bona. Mantsoe a mangata a monate, a maholo, ha baa ka ba a utloisisa.

⁹⁵ Ka mora nakoana, hoba a bone a le phoso, a bokella puo ea hae a e sunya sephakeng sa hae. Mahetla a hae a oa. Hlooho ea hae e kebisitsoe. Mangole a hae a lepeletse. A sekamela morao, ka boikokobetso, a tlotlotsoe, a theoha sefaleng.

⁹⁶ Mohalaleli oa khale o ne a lutse morao mono, a ntse a qamaka, a ama e mong, ho re, “Holane a nyoloha kamoo a theohileng kateng, a ka be a theohile kamoo a nyolohileng kateng.”

⁹⁷ Ka hona hoo ho batla ho nepahetse, ho fihlela motho a tseba hoba ha a tsebe letho, 'me a tla ikokobetsa pela Molimo 'me a lebele Moea o Halalelang ho etsa mosebetsi. Ke eona ntho eo. Motho a ke ke a fihlela letho ka bohlale ba hae. O tlameha ho itšetleha feela ka Molimo.

⁹⁸ Joale, motho ea etsang sena, e bontša phihlello kae-kae, ea morero o moholo ona ho lopolloa. 'Me Molimo o entse phihlello eo. O entse hoo, 'me A e etsa bonolo hakana: e ne e le ka tumelo. Molimo o boletse, tšimolohong, hore esale ebile ka tumelo. Kajeno ha u a bolokeha ka mesebetsi, ka lintho tse molemo, ka ho kena kereke, ka ho ruteha. “U pholositsoe feela ka tumelo, 'me ke ka mohau oa Molimo.” U pholositsoe ka tumelo, ka ho lumela se entsong ke Molimo.

⁹⁹ Molimo o thontse seemahale. Molimo o u neha se seng ho itšoarella ka sona, seemahale, joaloka folaga e leketlileng.

¹⁰⁰ 'Me Korea, le, oh, tlase lihlekehlekeng, mehleng ea nto, mohla Maamerika a neng a lelekile Majapane. 'Me ba mathela holimo Guam le libakeng tse fapaneng, ho fihla qhoeng ea leralla, leralla le phahameng ka ho fetisisa leo ba neng ba ka le fumana. 'Me mono, likeleli tse theohang marameng a bona, le ka mehoo, ba hloma folaga ea Amerika, Tlotla ea khale, ka holima leralla. Ba ne ba hapile lefatše. Ke phihlello e kakang, ho phahamisa seemahale seo, hore, "Sena ke sa rona." Oh, e bile monyetla o mokakang ho masole ao, ho ema mono lefatšeng leo ba le hapileng.

¹⁰¹ Kea le bolella, Molimo o file Kereke seemahale tsatsi le leng, mohla Jesu a neng a phahamisoa Kalvari lipakeng tsa maholimo lefatše, e ne e se mang haese Molimo, Immanuele, ho tšollela Mali a Hae fatše. Seemahale se ile sa phahamisetsoa batho, ho re, "Re hlotse. Re entse. Re fetisa le bahloli, hoba O re hloletse."

¹⁰² Joale re fumana Nohe, monna oa Molimo, o ne a ena le tumelo, 'me Molimo oa mo nea seemahale. 'Me seemahale seo e ne e le areka. 'Me Nohe a haha, ka tumelo, hobane e ne e le taelo ea Molimo, ho haha areka ena ho pholosa mang kapa mang ea tla kena ho eona. Joale, eareha Nohe a tsamaea, a haha areka, a tseba hobane o ne a phethela seemahale seo Molimo o mo laetseng ho se haha. Ntho efe eo Molimo a reng e etsoe, itsoarelle ho eona, hoba e lokile. Ho sa tsotelehe basomi ba bakae ba tšhileng 'me ba soma, Nohe o tsebile a tsoere HO RIALO MORENA.

¹⁰³ Bapisang Nohe le Nimrode. Nimrode o ne a fupile mohopolo oa hae ka eona; 'me Nohe a tsoere mohopolo oa Molimo ka eona. Nimrode a tsoere seo a ka behang matsoho a hae holima eona; 'me Nohe a tsoere seo a ka behang matsoho a hae holima sona. E ne e le seemahale, ntho eo a ka itsoarellang ka eona. Ruri.

¹⁰⁴ Re ntano fumana, ka mora moo. Re tla bua ka monna e mong kapele, 'me lebitso la hae e le Moshe. 'Me e ne e le monna a le mong feela. Empa a tla khona joang ho lopolla bana ba Iseraele Egepet, ho tsoa bokhobeng; ka mora ho ithuta sekolong, a koetlisitsoe bohlaeng bohle ba Baegepeta, 'me a iphumana a hlōtsoe ka botlalo? Empa ka tsatsi le leng, morao koana lefeelleng, Molimo oa kopana le eena, kapa a kopana le Molimo. 'Me Molimo oa mo neha seemahale, molamu ho o tsoara letsohong la hae. Ke ntho e nyatsehang hakakang, empa ea etsa mosebetsi. "Nka lere lena ka pela hao." E ne e le seemahale se tiileng. Hore, Moshe, mohla a neng a tsoere lere leo, a hoanta a tsoelapele ka lona.

¹⁰⁵ Ha se khale ha ke bala ka David Livingston, mohla ke emeng lebitleng la hae Landane. 'Me batho ba bangata ba etela lebitla la Livingston ho feta lebitla lefe kapa lefe le Abbey. Ebile, ha ke utloa pale ea Livingston, kamoo a theohetseng mono e le ngaka le Mokreste. Kamoo a ileng ho batala, 'me a sa khone ho kena, hobane ba ne ba khohlahetse haholo.

¹⁰⁶ Ka hona, a fihla ho khosi. 'Me a re, khosi a re, "Haeba u ka noa mali a selekane le 'na, u tla ba e mong oa rona." Kahoo ba tšela veine senolong, 'me ba phunyana methapo, le a leketlisa holima senoelo le ho tšela mali ka mono, le ho a tsoaka, mali a mabeli 'moho. Eaba Livingston o noa halofo ea eona. 'Me khosi a noa halofo ea eona.

¹⁰⁷ 'Me eaba ba nehelana seemahale, hore e ne e le baena. 'Me khosi a kopa jase ea bongaka ea Livingston, 'me a hlobola jase ea hae 'me a e nea khosi. 'Me Livingston a kopa khosi lerumo la hae le khethehileng.

¹⁰⁸ 'Me eitseha a khutlela likhoeng, 'me matsoalloa a mo seohela, a ka mo phunya ka lerumo, kamoo a utloileng monate ha a phahamisa seemahale sena, lerumo le khethehilemng. Mme eitse ha a se phahamisa, joalo, batala ba namalla fatše 'me ba batla ba mo rapela joaloka Molimo, kaha ba tsebile moo lerumo le ikhethang leo le tsoang teng.

¹⁰⁹ Joale, ho a tsoana le kajeno. Batho ba kajeno ha ba lemohe seemahale se seholo seo Molimo o re neileng sona.

¹¹⁰ U re, "Moena Branham, na u na le matla? Eka nka be ke ruile matla."

¹¹¹ Ha re na matla. Ha re na matla. Re ruile bolaoli. Ha se matla. Ke bolaoli. Ha re hloke matla. Krete o ruile matla. Empa re na le matla a bolaoli. Amen. Phapang e kholo. E ne e le Èena Ea hlotse. O hlotse 'me o re file bolaoli. O na le matla, empa re ruile borena, joaloka lenqosa lefe feela le eang naheng e 'ngoe.

¹¹² Mona, ho le hlalose eona. Ho fumanoa, tlase . . . U theohela tlase mona ho e 'ngoe ea litselana tsena mona Phoenix, ho ella hora ea bohloko thapama. Lepolesa le eme kantle mono. Likoloi ke tsena li feta, ka limaele tse mashome a mane, mashome a mahlano ka hora. Be, lepolesanyana leo mohlomong ha le bophahamo ba maoto a mahlano, ho tsoela ntle mono, 'me, khele, ha a na matla a lekaneng ho emisa e 'ngoe ea makoloi ao. Be, e 'ngoe ea makoloi ao ekaba matla a lipere tse makholo a mararo. Be, li thonaka thakanyana leo le ho mo pshatla, 'me li tsoelepele. Empa e re a phahamise letsoho la hae hang, a letse phala. Ha a na matla, empa o na le bolaoli. Ke eona. Mariki a tla thella, le mabili a tla tsetsela. Ntho e 'ngoe le e 'ngoe e tla ema hobane a phahamisitse letsoho la hae, hobane o na le bolaoli.

¹¹³ 'Me monna kapa mosali ha a apere lihlomo tsohle tsa Molimo, ha se matla. Ke bohloko bo tsoang Holimo, ha a re. Matemona a tla hooletsa 'me mariki a tla tsetsela. Esita le lefu ka bolona le tla reketla, le mabitla a tla buleha, ka borena boo Jesu Krete a bo fileng Kereke ea Hae. Banna bohle ba tseba sena. "Mehlolo e tla tsamaea le ba lumelang ke eona ena." Phahamisa bolaoli, seemahale.

¹¹⁴ Letsoho la hae lea phahama, o apere seatlana sa hae se sesoeu, 'me koloi e 'ngoe le e 'ngoe e tla ema. Ha a na matla

a lekaneng, mohlomong, ho—ho emisa baesekele. Empa bohola ba hae ke ho emisa ntho efe e fetang seterateng seo. Hobane hobaneng? Molao 'ohle oa Phoenix o mo tšhehilitse.

115 'Me Mokreste ea shoeleng, 'me a epetsoe, 'me a tsohile le Eèna tsohong ea Hae, libakeng tsa Leholimo! Lea bona, "Ha re shoele le Eèna, le rona re tsositsoe le Eena," hoba 'Mele o ea moo Hlooho e leng teng. 'Me Ke Hlooho, 'me ona ke 'Mele. 'Me hase hona e tla etsahala, empa, "Joale re lutse 'moho libakeng tsa Leholimo ka ho Kreste Jesu," matla ohle a liabolosi a hlotsoe le tlasa maoto a Hae. Bolaoli! Bolaoli, seemahale ke seo. Letsoho le phahamang, ke lona le bohlokoa.

116 Moshe a theohela Egepeti. Ho le maoatle a maholo kantle mono. A phahamisa seemahale, 'me ha etsahalang? A fetoha mali. Sa phahamisoa holima lefatše; lingenqane, linti, matsetse. Letsatsi la hana ho chaba. Lefu la otlale lefatše. Hobaneng? O ile a phahamisa seemahale sa kahlolo ea Molimo.

117 'Me ha re phahamisa seemahale sa kahlolo ea Molimo, joaloka molumeli ho Kreste, ka bophelo ba hau bo thakhisitsoeng le mehopolo ea hau, le ho tsoa, 'me Lentsoe la Hae le phelisitsoe hara lona, liabolosi e mong le e mong o tlameha ho tsetsela khahlano Le lona. Ke hantle. Hoba, e emetse Kreste. Le a bona? O shoele. Ke eèna ea phahamisitseng seemahale.

118 'Me Moshe ka molamu oa hae, eka ntho e nyenyane, empa e le thupa. 'Me e ne e le seemahale sa Molimo Egepeti, lere la hae la kahlolo, 'me la tliša kahlolo. Kamehla Molimo o aba seo u ka se shebang, seo u ka behang letsoho la hau holim'a sona, seo u ka se pakang, ntho e lokileng, hoba o Mo amohele. Banna ba bohlale, Magis . . .

119 Rea bala, Petrose o boletse a lemohile hobane Molimo o teng, o tla nka sechaba sefe sa batho, mang le mang ea lumetseng ho Eèna.

120 Banna ba bohlale, ba ne ba shebeletse naleli ho tsoa ho Jakobo, naleli e tliša tsoa ho Jakobo. 'Me ba fuoe seemahale. Mohla Jesu a neng a tsoalloa Bethlehema oa Judea, banna ba bohlale ba tsoang India ba latetse naleli. Oh, khili! Eng? Seemahale, bopaki, kholiso, kholiso e phahametseng tlhaho.

Mosalumele, ke rata hore u bone sena.

121 Ha se hore bohle ba tlameha ho e bona ka botlalo. Ha mang ea boneng naleli eo haese banna bao ba bararo. E fetile holim'a bolepi ka bong, kholiso ea sebele e phelang, seemahale ho ba tataisetsa ho Kreste. Ha ho mang ea e boneng haese bona.

122 "Ho se ho se hokae 'me lefatše ha le sa tliša Mpona. Empa lona le tliša Mpona, hoba Ke tliša ba le lona kamehla, ho isa bofelong ba lefatše." Seemahale, "Jesu Kreste esale eèna maobane, kajeno,

le kamehla,” seemahale sa ’nete sa Molimo. Ea sa lumeleng a ka tsoa a sa se bone.

¹²³ Jesu o boetse o itse, “Ea lumelang ho ’Na, mesebetsi eo Ke e etsang o tla e etsa le eëna.” E ne e tla ba eng? E ne e tla ba pontšo, seemahale.

¹²⁴ Ho kile ha koptjoa ho Eëna, “Ere mora oa ka a lule, e mong ka ho le letona, e mong ka ho le letšehali.”

¹²⁵ A re, “Na u ka noa senoelo seo Ke se noang? Na u ka kolobetsoa ka kolobetso eo Ke kolobetsoang ka eona?” ’Ona Moea o Halalelang o nong o lutse holim’a Hae kantle ho tekanyo, o theohela holim’a Kereke ea Hae ka tekanyo, empa E sa le ’ona Moea o Halalelang, ’ona Molimo oo. Ke seemahale.

¹²⁶ Re liemahale tsa Molimo lefatšeng. Ke ka hona ke lulang ke omanya kereke ea Pentekosta, ho ba latella, mekhoha ea bona ea ho phela. Ke ka lebaka leo lefatše le sa boneng Krete, ke hobane re lihetsa marapo. Re tloha ho seo.

¹²⁷ Ha basali ba rona ba apara ’me ba itšoara se sa lefatše lohle; ha banna ba rona ba tsoela kantle, le metlae e litšila, ’me ba tsuba, ’me ba tsoella joaloka ba bang; ba nyetse hane kapa hahlano, ntho e ’ngoe le e ’ngoe; ho hula, ho ba kenya kerekeng, le lintho tse joalo. Khele, che. E—e lefatše ha le lumele hore le na le Eona.

¹²⁸ A nke ke le bolelle, moena, ha u shoele, ’me bophelo ba hao bo patiloe ka ho Krete, ka Molimo, le ho tiisoa ka Moea o Halalelang, ’me Molimo o u phahamisetsa libakeng tsa Leholimo, u tla ba seemahale sa hore mosebetsi oa Molimo o phethiloe ka ho uena.

¹²⁹ Jesu o boletse ho Mareka 16, “Mehlolo e tla tsamaea le ba lumelang ke eona ena.” Ke seemahale sa mofuta ofe? Hempehali e hlohluoeng? Che. Boikokobetso. Botlalo ba Molimo ka ho Krete Jesu bo Mo tataisitse joaloka sehoai se ikokobelitseng, ho Mo hlatsooisa maoto a barutuo a Hae, ho se moo A samelang hlooho ea Hae teng.

¹³⁰ Ba bang ba rona ba ipitsa Bakreste, re ea sebakeng, re lokela ho fumana tse ntle ka ho fetisisa naheng; re tlameha ho tiisetsoa chelete e ngata hakana, re ke ke ra ea, moevangeli. Balisa ba bang ba ke ke ba ea kerekeng haese ha e le boemo bo phahameng le sebaka se sehlo. Oh, khili!

¹³¹ Re hloka phihlelo e ’ngoe ekang eo Pauluse a e boneng ha a le tseleng e eang Damaseka. Pauluse o bone seemahale seo se phahamisitsoe! ’Me a re, “U Mang, Morena?”

A re, “Ke ’na Jesu.”

¹³² Seo re se hloka bosiung bona ke Topallo e ’ngoe ea Mollo e leketlang holim’a kereke hape bosiung bona, mahlo a batho a fufetseng a tla tutuboloha ’me ba ka e bona.

¹³³ Jesu o sa phela le ho busa, e leng seemahale. Joale, ke Eèna... Molimo o re file seemahale sena. Ke seemahale sa Bosafeleng.

¹³⁴ Hopolang hore liemahale tsohle tsa Roma, liemahale tsohle tsa Nimrode, tsohle tsa Babilona, le tse ling tsohle, li pshatlehile 'me li timetse. Re li tseba ka nalane feela. Nkile ka ema Roma, moo boSesare ba kileng ba busa lefatše, 'me u tlameha ho cheka maoto a mashome a mabeli fatše mobung, ho fumana moo paleisi ea bona e neng e le teng. Ho ema Egepete moo Faro a neng a le teng, 'me e felile ea fetoha lerole.

¹³⁵ Moena, empa se teng seemahale seo Molimo o se fihletseng tsatsi le leng, ka ho tsosa Jesu Kreste bafung, le ho romela Moea o Halalelang holim'a Kereke ea Hae. "Me maholimo le lefatše li tla feta, empa Lentsoe la Hae le ke ke la feta." "Holim'a lejoe lena Ke tla haha Kereke ea Ka, 'me likhorro tsa lihele li ke ke tsa e hlola." Hobaneng? Seemahale se phelang se ka hara Kereke: seemahale, se sa fanyeng, kholiso e phethahetseng, ntho eo u ka e beang matsoho, ntho eo u ka e shebang.

¹³⁶ Bonang mona, mohlankana enoa, Williams e monyenyanane mona, a ema 'me a paka kamoo ntaae le 'mè ba mo rapeletseng kateng, 'me hang feela a bona seemahale. Ntho e 'ngoe ea etsahala. O bone. A lumelisa ntlu ea khale ea letsopa, eaba o qala ho matha a likoloha Molala, joaloka ha moena a boletse.

¹³⁷ Ha batho ba ka bona seo! "Ha Nka phahamisoa lefatšeng lena, Ke tla hulela batho bohle ho 'Na. Le lipaki tsa Ka. Le tla ba lipaki tsa Ka Jerusalema, Judea, Samaria, le ho isa lipheletsong tsa lefatše. Mehlole e tla tsamaea le ba lumelang ke eona ena. Ka Lebitso la Ka ba tla leleka matemona, ho bua ka lipuo tse ncha, ho tšoara linoha, ho noa lintho tse chefu, e ke ke ea ba ntša kotsi, ho beha matsoho a bona holima ba kulang, 'me ba tla fola." Seemahale. Ereng ke fumane e mong holima eo, ho maneha tiiso ka eona. "Batho bohle ba tla tseba ke hona hobane le barutuo ba Ka, ha le ratana." Le a bona? U ke ke ua nka karolo ea eona. U tlameha ho e nka kaofela. 'Me e ke ke ea manehoa tiiso hofihlela ntho eo eohle E fihlile. Ke hantle.

¹³⁸ Naheng ea khale, mehleng ea khale, tiiso hangata e ne e le lesale. Monna ea sa khoneng ho saena lebitso la hae, a mpa a kentse lesale, 'me a maneha tiiso. Ea hae, e ka ba eng eo a e ngotseng, khele, feela o ne, sebakeng sa ho tekana lebitso la hae, a maneha tiiso ho eona. E ne e le tlolo ea molao ho kopitsa tiiso eo.

¹³⁹ Joale, kajeno, Molimo o na le Tiiso, 'me ke kotlo ea lefu ho kopitsa Tiiso eo. Mamelang, lona MaLuthere, Mamethodise, Mabaptise, Presbeteriene le Mapentekosta, le se ke la E kopitsa.

¹⁴⁰ Khutsa, 'me Molimo o tla E maneha holima hau. 'Me joale u tla ba seemahale, mohlala oa Bokreste, le bonna le bosali. Tiiso ea Moea o Halalelang, seemahale sa Molimo, se tlapisitsoe ka ho

uena ho fihlela u talima, nka khato, tsamaea, bua Evangeli hohle moo u eang teng. Ha ho monoana o ka u supang. Ke hantle.

¹⁴¹ Molimo o fihletse hoo ka lefu, le kepele, le tsoho ea Jesu Krete, “Ka hlatsuo ea metsi ka Lentsoe.” Ka Mali a Hae kajeno re hlatsuo a le ho hloekisoa, re fuoa monyetla ona o moholo.

¹⁴² Lea bona, re ipotsa seo Jesu a neng a le sona, haeba re ka re E ne e le eena maobane, kajeno, le kamehla. Joale, seo A neng a le sona maobane, O sona kajeno, 'me ho tla ba joalo kamehla, seemahale sona seo.

¹⁴³ Re fumana seo seemahale se neng se le sona mohlantso oo ho batho bao, ho tseba haeba E ne e le seemahale se nepahetseng se neng se lebelletse ho tla. Re bona Mangolong, moo A boletseng A sa etsa letho le ka mohla. Ha A bolela le ka mohla. O itse, “Ha se 'Na ea etsang mesebetsi. Ke Ntate oa Ka ea ahileng ka ho 'Na. O etsa mesebetsi. Kannete-nete Ke re ho lona, Mora o sitoa ho etsa letho, haese seo A bonang Ntate a se etsa, Mora o se etsa joalo le eena.” Ke seo A boneng Ntate a se etsa. Ka mantsoe a mang, O e bone ka pono, se etsahetseng.

¹⁴⁴ Re fumana, mosali a amile seaparo sa Hae. A retoloha a mo sheba, le ho 'molella. O ne a tšoeroe ke phallo ea mali, 'me e khaolitse. Tumelo ea hae e mo pholositse.

Mosali selibeng. Ho re, “E-ea, lata monna oa hau.”

A re, “Ha ke na eena.” Ho re, “Be, rōna . . .”

“U buile 'nete, hoba u bile le ba bahlano.”

¹⁴⁵ Eitseha A bolela seo, a re, “Monghali, re a tseba hore Messia o a tla, Ea bitsoang Krete. Mohla A tlang, O tla re bolella lintho tsena.” Ua bona?

Seemahale e ne e le seo. A re, “Ke 'Na ea buang le uena.”

¹⁴⁶ Oh, moena, nkho ea metsi ea sala. O ne a fumane seliba se tletseng Mali a montsoeng metsong ea Emmanuele. O ne a fumane Seliba sa pholoso. O ne a fumane Seliba. A matha a kena motseng. Oa bona? O ne a supisa banna ka thabo. A re, “Tloong, le bone Eo re mo fumaneng. Bonang Monna ea mpoleletseng lintho tsohle tseo ke li entseng.”

¹⁴⁷ Shebang Andrae, eo ke rerileng ka eena maobane bosiu mono. Joang, hang hoba a hlole le Jesu bosiu bohle, 'me a fumana hore ruri eo e ne e le paki ea Molimo, eo e ne e le Messia, ha a ka a tloha, ho re, “Simone, tloo, nthuse ho e utloisisa.” O tsebile hore E ne e le Messia.

¹⁴⁸ 'Me hang ha a nyolohela pela Hae, A 'molella hore ke mang, le hore na lebitso la ntatae e ne e le mang, 'me Petrose o ne a tseba hore ke sona se neng se tla etsahala.

¹⁴⁹ Filipi o entse hona hoo. Le, oh, joalo, le joalo, le joalo, seemahale.

150 Jesu o boletse, ho Santa Johanne 14:12, “Ea lumelang ho 'Na, mesebetsi eo Ke e etsang o tla e etsa le eëna.”

151 Joale shebang. Re romiloetsoe. Mamelang mona, metsoalle, kaofela ha lona. Ke bua le lona batho joale, ke hantle joale, ho batho ba tla rapelloa. Mamelang sena.

152 U paki. U pholositsoe, 'me u tseba seo matla a Molimo a leng sona, u amile seemahale seo. U tsoere ho hong, ho hong, e seng tora ea Nimrode. Ebile ha se e—e foreskoto ea lehlaku la Adama la feiga. Empa ke tšepiso ea Molimo, ho re, “Maholimo le lefatše li tla feta, empa Lentsoe la Ka le ke ke la feta.” Ke ntho eo u ka e tšoarang ka matsoho. “Mehlolo e tla tsamaea le ba lumelang ke eona ena. Ha ba bea matsoho holima ba kulang, ba tla fola.” Ke seemahale, seemahale sa sebele.

153 'Me ho lona batho, ho na le e mong mona, ea eso ka a amohela seemahale sena, ba sa tsebeng hoba batho bana llisoa ke'ng, le ho hoeletsa, le ho tantša; le kamoo se holisang basali bana ba moriri oa bona, le ho khaotsa ho apara dliaparo tseo tsa khale tse litšila, le—le ho chachehisa nama ka pel'a banna, le lintho tse joalo, moea oo oa khale o mobe o tsoile ho bona.

154 U se ke ua mpoella. U ka hloeka joalo ka mohalalitoe ho monna oa hau; empa ha u fihla Setulong sa Kahlolo, u tla arabela bohloa. Ke hantle. Bible e boletse. Jesu o itse, “Ea shebang mosali ho mo lakatsa o se a mo febile pelōng ea hae.” 'Me ha u ikapesa ho ipepesa pel'a banna, u molato, leha monna a sa u ame. Ha moetsalibe eo a arabela bofebe ba hae, ke uena ea bo entseng. U ipepesitse. E, monghali. Moena, khaitseli, u ka e hopola e ntho ea khale.

155 Ke fumane moreri nakoana e fetileng, ho re, “U tlil'o senya tšebetso ea hau, Moena Branham.”

156 Ka re, “Ha se ba ka. Ke ba Hae. 'Me leo ke Lentsoe la Hae, 'me ke seo A se buileng.” Ke a E lumela. E, monghali. E, monghali. Hantle.

157 Ka hona ha u bona e mong oa basali bao a tsepama ho Molimo, u tla 'mona a tsoa joaloka mohalaleli. U tla 'mona a itsoere ka ho fapana. Ho tla ba—ho tla ba le phapang bophelong ba hae. Khalalelo e tla bua hohle. E tla ba mofumahali.

158 Shebang monna eo, letahoa leo kantle mono seterateng, a thekesela, ntsintsi ea tamene, 'me molomo oa hae o tanakelloa ke ntsintsi, ka baka la ho hlatsa, ka whisky le biri le linyee tse joalo. A ke a thehele aletareng 'me a tsoare seemahale seo ka tsatsi le leng, 'me kea le bolella e tla ba seemahale ho Molimo, le sehopotso sa matla a pholosang a Jesu Krete. E, monghali. Ruri o tla etsa joalo.

159 Nkile ka ema tlase, tsatsi le leng, mona literateng tsa Phoenix 'me ka bona moshanyana, oa 'mala a eme kantle mono. Mohlankana, ho ne ho se motho ea mo tsotellang. A khoetse

Bibele ea hae tlasa sephaka sa hae, 'me mang ea fetang, a ba supisa Evangeli, ka matla a bokhoni ba hae. Ka re, "Ke leboha Morena Molimo. Oh, khili! E hoeletse, moena. Lula u tsoellisa feela. Ho itoketse, ho phahamisa Jesu Kreste."

¹⁶⁰ Oh, haeba le sa Mo tsebe bosiung bona, metsoalle, Mo amoheleng. Na u ke ke oa e etsa, re sa inamisa lihlooho tsa rona motsotso feela bakeng sa thapelo? Ke masoabi, nako e ntse e tsamaea kapele haholo.

¹⁶¹ Ke batla ho botsa, nakoana feela, na ho na le moetsalibe mona bosiung bona ea sa tsebeng Kreste 'me a eso ka a amohela seemahale see?

¹⁶² Haeba u lekile ho sibolla, ho re, "Joale, Moena Branham, joale nakoana feela. Ke boloka molao oa gauta." Moena, hoja seo sa tiea, Jesu a ka be a ne a sa tlameha ho shoa. Ho re, "Moena Branham, ke fetohile setho sa kereke e tsoileng ka mahetla."

¹⁶³ Ho lokile, moena ka. Ke ananela seo, 'me ke ananela ha u boloka molao oa gauta. Ke le ananela ha le boloka melao e leshome. Empa hola molao oa gauta, ho ikopanya le kereke, kapa efe feela ea lintho tseo, e ka be e u pholositse, Jesu o shoetse lefeela. Jesu o boletse, ka boEëna, ho Santa Johanne, khaolong ea 3, "Motho ha a sa tsoaloe labobeli, a ke ke a kena."

¹⁶⁴ Bophelo bo tsoana le lehlaku le leketlileng sefateng. Ka mora nakoana bophelo bo siea lehlaku, 'me bo khutlela metsong ea sona. Lehlaku le a foforeha. Bophelo boo bo patiloe metsong ho fihlela mariha a fetile. Sehleng sa selemo le khutlisa bophelo bo bong, lehlaku le leng.

¹⁶⁵ Ke mokhoa oa Mokreste ea Sefateng sa Bophelo. Lehaha lena la khale mona le ka foforeha. Ke 'nete. Empa bophelo bo khutlela ho Molimo O bo abileng. Le a bona? Haeba Molimo a u nea bophelo ba hau, u tsoetsoe labobeli, bophelo bo le bong feela bo ka phelang le ka mohla, 'me boo ke Bophelo ba Molimo ka ho uena. 'Me haeba bophelo boo bo ahile ka ho uena, bo tla ea feela moo bo tsoang teng, ho khutlela ho Molimo, ho khutla hape Seketeng sa Lilemo tse kholilemo, ka lehlaku le lecha, kapa bophelo bo bocha, kapa o mocha—kapa 'mele o mocha o ke keng oa nyamela le ho pona kamehla.

¹⁶⁶ Lihla tsa rona li bolela hoba Molimo o na le rona, hore Molimo o teng mona. O laetse tlhaho. Joale, haeba u eso amohela bophelo boo le ka mohla, haeba lehlakunyana leo le ka foforeha bosiung bona, lehlakunyana lena leo u leng lona mona lefatšeng, u a tseba le ke ke la hlola le tsoha hape; haeba u eso tsoaloe labobeli, u eso amohela seemahale pelong ea hao, bopaki, Moea o Halalelang. E seng monahano feela. U ke ke ua e akanya.

¹⁶⁷ Ke buile nqa e 'ngoe bosiu bo bong, le ho re, "Ho ka thoeng holane barutuo ba eme matsatsi a robong, le ho re, 'Re tla O amohela ka tumelo, hore re fumane Moea o Halalelang, le ho tsoelapele?'" Ba ka be ba sa O fumana. Lea bona? Ba lutse

mono ho fihlela ba tseba hore O ne o le teng mono. Ntho e ne e etsahetse, ntho eo ba ka beang matsoho a bona holim'a eona, ho re, "Ke eona ena." Joaloka ha Nohe a ne a ka re, "Ke eona ena." Joaloka ha Moshe a ne a ka bolela, ka molamu letsohong la hae, "Ke eona ena."

"U tla hlola joang, Moshe?"

"Ke tla hlola ka thupa ena. Ke tla e etsa joalo."

¹⁶⁸ 'Me ka Jesu Kreste, ka Moea o Halalelang, ke hlotse. Ke entse, ehlike O ntlholetse. 'Me joale ke . . . Bophelo baka bo shoele, me bo patiloe ka ho Eena, 'me bo tiisitsoe ka Moea o Halalelang. E teng.

¹⁶⁹ Haeba u eso fumane boiphihlelo boo bosiung bona, motsoalle oa moetsalibe, na u ka tla re sa inamisa lihlooho tsa rōna nakoana feela?

¹⁷⁰ Ntata rōna oa Leholimō, joale ke nehela letšoele ho Uena. Ho ka ba le motho ea tsoileng tseleng mona eo mohlomong a ke keng a hlola a ba le monyetla hape. Re e utloa feela mohaleng, metsotsoaneng e 'maloa e fetileng, kapa nakong e fetileng, Moena Tommy Hicks, mohlanka oa Hau ea ratehang. Moenae, eo a mo lletseng, ho mo qela, liveke tse 'maloa tse fetileng, esita le ho mo romella lengolo, le ho re, "Moena, amohela Kreste."

¹⁷¹ Empa o ne a etsa chelete e ngata hakana, ho mo rekela lehae la lidolara tse likete tse lekholo, Cadillac e ncha, a se na nako ea ho e etsa. "Kea kholoa ke tla etsa seo hamorao, Tommy." Empa e se e le morao haholo joale. Ea mo khaoletsa, tlase Mexico.

¹⁷² Oho Molimo, hauhela. Batho ba tsebe hoba ha ho sa sa ho khutla ho leka hape. Ona ke ona feela monyetla. 'Me lefu ha le fetole moea; le mpa le fetola bolulo ba lona.

¹⁷³ Joale, Ntate, ke a rapela, haeba moea o le teng mona o tsebang hoba ba bopiloe ka boleng bona bo hararo, ba soule 'moho, 'mele, le moea, bokahare boo ba lekhapetla boo ba phelang ka ho bona ke moea. Ka hara soule e ba laolang ho na le moea. Ka hare ho lithokutlo tse hlano ke moea. 'Me ha moea oo e se Moea oa Molimo, mohlana sena se seng se oang, o ke ke oa hlola o tsoha. Empa, Molimo, ke a U rapela, ba tle ba U amohele joale, 'me ba tšoare seemahale sena se setle sa Moea o Halalelang lipelong tsa bona 'me ba bolokehe bosiung bona.

¹⁷⁴ 'Me re sa inamisitse lihlooho tsa rōna, mang ea batlang ho hopoloe, phahamisa letsoho la hau joale, ho re, "Nthapelle, moena, moreri." Molimo a u hlohonolofatse. Molimo a u hlohonolofatse. Molimo a u hlohonolofatse. Molimo a u hlohonolofatse, uena, khaitseti. Ho lokile haholo. Motho e mong? Joale, u se ke ua hlabjoa ke lihlong.

¹⁷⁵ Lulang le rapela, Bakreste bohle. Batho bana ba phahamisa matsoho a bona.

¹⁷⁶ Molimo a u hlohonolofatse, mofumahatsana. Molimo a u hlohonolofatse, khaitseti. Motho e mong hape? Ho re, “Nkhopole, Moena Branham. Ke, joale kea lumela. Ke—ke e lumela feela, ka mokhoa o itseng. Ke e lumela feela.” Motho e mong? Molimo a u hlohonolofatse. Molimo a u hlohonolofatse, ka mona. U hlohonolofatsoe, morao mono. Ke botle.

¹⁷⁷ Joale, bao ke batho ba phahamisitseng matsoho a bona. Ba e lumela. Aletare e eme e tletse bana. Ba hohle, hohle. Ha u hlokoe ho tsoara aletare. Pelo ea hau ke aletare. Pelo ea hau ke moo Molimo a tlang teng.

¹⁷⁸ Ke ne ke bala, ka tsatsi le leng, nalaneng, *Leeto la Mokreste*, ea Broadbent, *Bontate ba Nicene*, hore mono, kerekeng ea pele, ha ba eso take mekhabiso, ho se na esita le aletare. Hobane, bapagane, ba sokolohang, ba ne ba lemaletse ho namalla aletareng. Ba ahile moaho o monyenyanane feela oa khale o pala teng ba lula holim’a letlapa la majoe. Ba phahamise matsoho a bona hoba monna emong oa morapeli a hlahise molaetsa. ‘Me ba phahamisa matsoho a bona ‘me ba rorisa Molimo. Ba ne ba rata litlamorao tseo tsa Moea o Halalelang o neng o phallela hara bona. E ne e le kereke ea ho qala mehleng ea Irenease le Martin, le ba joalo, hantle ka mora lefu la Morena Jesu, mohla kereke e tsoellang, pele e kena Bokatoliking. Oh, ke seo re se ratang.

¹⁷⁹ Joale, uena ka mona etsa aletare eo pelo ea hau joale, le ho re, “Kena, Morena Jesu.” Ke tla u rapella.

¹⁸⁰ Morena Jesu, kea tšepa hore, ho potlaka ka potlako, ho lahlela mantsoe ana ‘moho, ho itokisa joale, ‘me re emetse ho bona seo U tlang ho se etsa moleng oa thapelo, re sa tsebe hantle seo U tlang ho se etsa. Empa, koana, ho phahame matsoho a ka bang leshome le metso e ‘meli, a bacha le ba baholo, ba lakatsang ho U tseba, Ntate, ba lakatsa ho fumana Bophelo Bosafeleng boo. E ke e be bonnete ho bona hona joale. Aba sena, Morena. Moea o thekothata oa Molimo o ke o phallele meeng ea bona hona joale le ho ba etsa babopuo ba bacha ka ho Kreste.

¹⁸¹ ‘Me joale, Ntate, kea rapela moleng oa thapelo hore U tla Ipontša hakana ka pela letšoele lena bosiueng bona ka ho folisa bakuli, ba tle ba tlohe mona ba bua joaloka bao ba tsoang Emmause, “Na lipelō tsa rōna li ne li sa chese ka ho rōna?” Hobane, ba bone ntho e ‘ngoe e etsoa, batho bao ba Emmause, baena bao. Ba tsamaile letšoare lohle, Kleopa le bao, ba bua le Eëna, empa koana ha ba Mo tseba e ne e le mang. Empa hoba A etse hantle kamoo A e entse pele ho thakhiso ea Hae le kepele, ba tsebile hoba O tsohile bafung. Na U tla e etsa hape bosiueng bona, Ntate? Aba sena, re a rapela.

¹⁸² Joale re U rapela ho nka meea ena e thekothata, ho e abela Bophelo Bosafeleng. Ebang, ba eso kolobetsoe, ba fumane tsela ea bona e eang ntlung ea moruti kae-kae ‘me ba kolobetsoe, ho bitsa Lebitso la Morena. ‘Me U ke u ba tlatse ka Moea o

Halalelang. 'Me re ke re kopane le bona Khanyeng, lefatšeng le molemongoana, moo kopano ea bosiu bona e tlang ho huleloa kahlong. Re e laeletsa ho Uena joale, ka Lebitso la Jesu. Amen.

Ke a Mo rata, ke . . .

Joale, ka morao ho Molaetsa o thata, ha re roriseng joale.

Hoba A nthatile pele

Le ho lefella poloko ea ka

Fateng sa Kalvari.

¹⁸³ Na ha u rate seo? Kaofela bao . . . Lona bao le neng le le Methodise, phahamisang matsoho a lona; Baptists, Presbyterian, Catholic. Joale, bohle ba tsoetsoeng labobeli ke Moea oa Molimo, phahamisang matsoho a lona, le ha u le Methodise, Baptise, kapa Katolike, kapa eng. Na ha ho joalo?

¹⁸⁴ Joale, re sa se bina hape, ka mosa ruri, khaitseli a re fe lehlaso joale. Na ha le rate seo? Oh, khili!

¹⁸⁵ Le a tseba, ha u fihla Leholimong, 'me u kena ka tlung ea hau e kholo le ho sheba tlase mono, u tla bona tulonyana ea ka tlase mane. Hoseng ho hong hona, le nkutloa ke tsoa, ke e bina, lea tseba ke fumane Lehae. Amen. Ke mpa ke rata hoo feela. Ho lokile.

¹⁸⁶ Kaofela 'moho joale. Feela ha u behe . . . E-ba uena feela. Ke rata 'mino o monate oa pentekosta. Lona ha le joalo? Ha ke rate lentsoe le koetlisitsoeng ho feta tekano, ua tseba, le tsetselang, le ho bipa moea, le sefahleho se boputsoa ba leholimo, 'me u leka feela ho maneha ntho e itseng. Ke—ke rata 'mino o monate, 'mino oa sebele, o phallang. Joale e mong le e mong, 'moho, 'moho le sehlopha sa 'mino se senyenyanane, 'moho joale. Kaofela 'moho joale.

Ke a Mo rata . . .

Ha re koaleng mahlo a rōna.

. . . kea Mo rata,

Hoba A nthatile pele

Le ho lefella poloko ea ka

Fateng sa Kalvari.

¹⁸⁷ Joale, ka mosa ruri, feela, re sa bina hape. Ha re reteleheng 'me re tsukutlane ka matsoho le motho ea pela hau, kapele le ka morao, joale. "Ke . . ." Lona bohle bajaki, bajaki, bafeti ho lefatše. Katolike, tsukutlang matsoho le Protestanta. Protestanta, tsukutlana le Mamethodise ka matsoho. Mamethodise, le Mabaptise, Mapentekosta. "Ratile . . ." Church of God, le Assemblies. Assemblies, le Oneness. Oh!

Lefelletse pholoho ea ka

Fateng sa Kalvari.

Joale ka matsoho a rona a phahamiselitsoeng ho Eèna.

Ke a Mo rata, ke a Mo rata

Hoba A nthatile pele
 Le ho lefella poloko ea ka
 Fateng sa Kalvari.

Joale, ka boikokobetso, ha re inamiseng lihlooho tsa rōna re se binele ka marameng.

¹⁸⁸ Ntate, re ipolela libe tsa rona, Lentsoe le sa ntse le jaloa lipelong tsa batho, seemahale seo. Bongata ba bona bo ithutile eona khale koana. Tsamaea har'a rōna joale, Ntate. U pholositse ba lahlehileng. Joale folisa bakuli, ho tle ho tsebjoie hobane Lentsoe la Hau le ke ke la khutlela ho Uena le le feela. E tla phethahatsa seo e se tšepisitseng. [Moena Branham o qala a binela *Ke a Mo Rata* ka marameng—Mohl.]

¹⁸⁹ Litlankana tsa thapelo joale, ho qala ka palo ea 'ngoe, qalang le eme hantle pel'a aletare *tjena*, mona. Thapelo . . . Emang. Nka mpa ka ba bitsa, ea mong ka nako, pherekano e ke ke ea hlaha. Setlankana sa thapelo sa palo ea 'ngoe.

Ha u ka lula u letsa sefela, khaitseli.

¹⁹⁰ Ke mang ea tšoereng setlankana sa thapelo sa palo ea 'ngoe? Hantle mona. Palo ea peli, palo ea tharō. Ho lokile. Tharō. Palo ea 'ne, palo ea hlano, palo ea tšelela, palo ea supa. Tsoela hantle feela, 'me le tle hantle mona, le eme hantle feela ka tsela *ena*.

¹⁹¹ [Moena Branham o qala a binela *Ke a Mo Rata* ka marameng—Mohl.]

Ke . . .

Lulang moeeng oa thapelo joale, ka mosa, ka khutso.

Hoba A nthatile . . .

¹⁹² Robeli, robong, leshome, leshome 'ngoe, leshome le peli, leshome le tharo, leshome le 'ne, leshome le hlano, leshome le tšelela, leshome le supa, leshome le robeli.

O lefelletse poloko ea ka
 Fateng sa Kalvari.

Joale lona bohle ba tšoereng litlankana tsa thapelo.

A nthatile pele
 Le ho lefella poloko ea ka
 Holima . . .

Phahamisa letsoho la hau, feela, ka Lebitso la Jesu.

. . . sefate.

¹⁹³ [Moena Billy Paul Branham o buisana le Moena Branham—Mohl.] (E, mora.)

¹⁹⁴ Oh, na ha A babatsehe? Se bineleng ka marameng.

Mo rata, ke . . .

U utloa seo? Ekare lithoko tsa Mangeloi, le a bona.

. . . nthatile pele

Le ho lefella poloko ea ka
Fateng sa Kalvari.

¹⁹⁵ Na e utloahala monate? [Moena Branham o qala a binela *Ke a Mo Rata* ka marameng—Mohl.]

Na ha u utloe joale ha litloloko li lla?
Na ha u utloe Mangeloi a binang?
Ke khanya allelua Jubile.
Monateng hole-hole kamehla, (Ho bokoe
Molimo!)
Feela mose ho noka e phatsimang,
Mohla ba leletsetsang 'na le uena tleloko tsa
gauta.

¹⁹⁶ Joale, ha ke khone ho e tlohela mono. Oh, ke rata seo. Ke hopola mora oa ka, Billy, mohla 'mè oa hae a neng a hlokahala. Lihora tse 'maloa, khaitsetli ea hae e monyenyanane a hlokahala. Ka ba beha 'moho, holim'a leralla, le ho ba epela. Ho nyolohela mono, le ho lula fatše. Leebakhoroana la khale le ne le lula kantle mono le ntse le kuruetsa. Ka botšepahi ka hopola ekaba moea oa bona o khutlileng, o buisanang le 'na. Ka robaha pelō hona. 'Me ea ka, ha ke theoha hara liphaene tseo, ho hoeshetsoa, ntho e kang eo.

Naha e teng mose ho noka,
Ho thoe e monate kamehla,
'Me re fihla lebopong leo feela ka tumelo...
(Na ha ho joalo, metsoalle? Hum! Khili!)
Re tla fihla khorong ka bonngoe,
Teng ho aha le ba sa shoeng,
(Na ho ke ke ha e-ba monate ha ba etsa sena?)
Mohla ba leletsetsang 'na le uena tleloko tsa
gauta.

¹⁹⁷ Joale, metsoalle, pholisong ea Khalalelo, ho na le—ha ho motho ea ka u folisang, joalokaha motho ofe a ke ke a u pholosa; hobane pholiso le pholoso li se li fetile. Mohla Jesu Krete a na a shoa Kalvari, “O hlabetsoe litlolo tsa rōna. Re folisitsoe ka maqeba a Hae.” Ke mosebetsi o phethiloeng. Joale, ntho feela eo u lokelang ho e etsa, ho amohela pholoso ea hau kapa pholiso ea hau, ke ho amohela seo Krete a u etselitseng sona.

¹⁹⁸ Joaloka ha ke boletse, bosiung bo bong, ha re shebeng Molimo nakoana, morao koana Bosafeleng, mohla a Hae... mohla matsatsi a libilione tse lekholo a bonahetseng a le matšo ho Èèna, mohla Mangeloi a bonahetseng a le litšila mahlong a Hae. Ke Jehova eo. 'Me eaba O fetoha leseae, holima qubu ea moiteli, kahara sejelo. E sa ntse e le Jehova. 'Me ke Enoa bosiung bona. Ka mohau oa Hae le ka Mali a Hae, O hloekisa Kereke ea Hae le ho re bea malulong ho amohela mahlohonolo ana 'ohle A re lefeletseng 'ona.

199 Joale mona ho eme mola oa batho. Ha ke eso bone le a mong oa bona bophelong, kamoo ke tsebang.

200 Joale, bongata ba lona le kile la etela likopano tsa ka 'me la tseba seo temoho ea moea e leng sona. Kaofela ha lona le tseba seo. Ha ho joalo? Re tseba seo. Ke e phetile khafetsa le khafetsa, le khafetsa le khafetsa. Eo ke neo. Hoo ha ho holise Moea o Halalelang ka ho 'na ho feta mang osele. Eo ke neo feela, ho sebetse 'moho le Moea o Halalelang. Le a bona?

201 Ho sa tsotelehe haeba e le 'malelapanyana, kapa moshanyana, kapa letahoa kantle mono le sa tsoa pholoso a le ho tlatsoa ka Moea o Halalelang, o na le Moea o Halalelang oo e mong le e mong oa rona a nang le 'ona. Ee. Empa Molimo o aba lineo, ka Moea ona o Halalelang, ho sebetse. Ke netefatso, ho phahamisa seemahale. Ke mang, moreri? Che. Ho phahamisetsa Krete.

202 Joale, ha ke tsebe se kileng sa etsahala. Enere ke sa le moshanyana. . . Le tseba pale ea ka. Ke sa tsoa rapella batho. Ha ke etse letho haese ho rapela feela, ho ba bea matsoho, ba tla fola. Lea bona? Joale ke ne ke tla etsa joang? Ha se 'na feela ea rapelang, empa shebang ba bang ba ntseng ba rapela. Bohle baa rapela. Ua bona? 'Me, feela, ke a e lumela. Ke phetho seo ke tsebang ho se etsa. Ke a e lumela.

203 Joale, ha kea ruteha, ha ke na thuto ea letho. 'Me ke hopola Morena a mphile neonyana ho sebetse ka eona. 'Me—'me joale, mohla Jesu a neng a bua, mehleng ea Hae mona lefatšeng, lintho tseo A li entseng, le rōna re tla li etsa. 'Me haeba ho le joalo. . .

204 'Me ene ele seemahale sa Molimo, ka ho etsa seo: ka ho khona ho bolella Filipi moo a neng a le teng; ho bolella mosali ka phallo ea hae ea mali, le eng hape; le—le moo chelete e neng e le teng, molomong oa hlapi; kapa ntho e kang eo, ntho e 'ngoe; hore, mosali, hore o ne a phela bohloa, kapa ntho efe feela e kang eo. Eo ruri e ne e le netefatso ea hore E ne e le Messia.

205 Joale shebang Mojuda ea tiileng, Filipi, ha Filipi kapa. . . Nathanaele a fihla. Nathanaele e ne e le moithuti, moruti oa 'nete oa molaotheo. 'Me eitse ha a bona Jesu, ha a Mo lumela habonolo. 'Me A re, "Bonang Moiserale eo ho seng mano ho eëna."

A re, "U ntsebella kae, Monghali?"

Ho re, "Le pele Filipi a u bitsa."

Ho re, "Rabbi, U Mora Molimo, Morena ea Iseralee."

Mosali selibeng o itse, "Ha ke na monna."

A re, "E, u bile le ba bahlano."

206 A re, "Re a tseba, Messia mohla a tlang, O tla re bolella lintho tseo. Empa Uena u Mang?"

A re, "Ke Eëna."

"Re a tseba hore seo e tla ba seemahale."

207 'Me ha Jesu Kreste e le eèna seemahale seo maobane kajeno, le kamehla, O tla etsa ntho e tšoanang ha A ka tšoara pelo ea motho. Na ho joalo?

208 Joale, mofumahali enoa ea emeng mona, ha ke mo tsebe, ha ke eso 'mone. Ha re tsebane. Na ha ho joalo? Ke hantle. Ha Molimo a ka mpoella bothata ba hao, na u tla ntumela? U a tseba haeba e lokile kapa che, ha ke re? Na u tla amohela pholiso ea hau he? E mokokotlong oa hau. Ho felile ka eona. U folile. Ke ka moo ho leng kateng...?...Joale tsamaea, 'me Molimo a u hlohonolofatse. E-ea.

209 [Khaitseti o re, "Rapella mora oa ka."—Mohl.] Ua bona? Molimo a u hlohonolofatse. ["Ke eèna ea nang le mofetše ka ho...?..."] Ha u ka lumela, pelo ea hau eohle. E. U lumela ka pelō eohle ea hau? Ua bona? E ba le tumelo feela. U se belaele. Lumela.

210 Joale le bona kamoo ho leng bonolo kateng. Joale, ha re rapela feela...Joale, le a bona, O tseba seo, e mong le e mong oa lona, se phoso ka lona. U lumela seo, ha ho joalo? Ua tseba hore ho joalo. Joale, ha nka nka mofumahali enoa mona, 'me ke re nke ke ka bua letho ka eona, empa ho rapela feela le ho u bea matsoho, u lumela hore u tla fola? U a lumela hore u tla fola? Ho lokile. Inamisa hlooho ea hau, nakoana feela.

211 Ntate ea Leholimong, ke rapela hore U tle o folise khaitseti ea rona. A ke a tsamaee joale. Re bona seemahale se phahamiselitsoe holimo. Re a tseba hore O tla hula bohle. Ke bea matsoho holima khaitseti ea ka, ka Lebitso la Jesu Kreste, bakeng sa pholiso ea hae. Amen.

Se belaele. Lumela feela ka pelō eohle ea hau.

212 Ke re, haeba ke sa bue letho, ho u rapella feela, u sa ntse u tla e lumela. Na u ke ke? U tla e lumela, le ha ho le joalo. Empa ha nka u bolella, na e tla u thusa? Bothata ba pelo ea hau. Ke hantle. Tsoela pele.

213 Na e tla u thusa ha nka u bolella bothata ba hau? Che, ha u—u tsebe haeba e tla u thusa kapa che. Be, mohlomong ke tla u rapella feela.

214 Ntate ea Leholimong, ke rapela hore U tle o thuse mosali eo. Mo fe tumelo le matla, ka Lebitso la Jesu Kreste. Amen.

Lumela joale ka pelō eohle ea hau.

215 U nahana'ng, khaitseti? Ke osele ho uena. Ha Jesu a ka mpoella se phoso ka uena...[Khaitseti o re, "Ha o eèna."—Mohl.] Ha ke eèna? U a ntseba, joale? ["Che. Ke u bone mohlā u fihlang la ho qala."] U mpone ha ke fihla. Ke botle. ["Khetlo la pele."] Ke bolela, ha ke u tsebe. ["Khetlo la pele, le hona."] Khetlo la pele? ["E. U ile ua nthapella."] E ka ba lilemo tse leshome le metso e mehlano tse fetileng. ["E. E batla e le leshome le metso e mehlano feela."] Lilemo tse leshome le metso e

mehlano tse fetileng. Khele, e se e le nako e telele. [“E, ho joalo.”] Ho etsahetse lintho tse ngata—ngata ho tloha mohlang oo. [“E, ho joalo.”] Be, u tla tlameha ho etsoa oporeishene. [“E.”] Empa ha u ka lumela Krete, lethopa leo le tla u lesa, 'me u ke ke ua tlameha ho etsoa oporeishene. [“Amen.”] U a e lumela na? [“E, monghali. Ke a lumela.”] Ikele ke hona, u e lumele.

216 U phela joang? [Khaitseteli o re, “U mpone pele.”—Mohl.] Ke u bone. Empa na u a lumela, ha ke kopa Molimo, O tla u folisa?

217 Ntata rōna oa Leholimō, ke U rapela ho mo folisa le ho mo phekola, Ntate. Ke mo beha matsoho, ka Lebiso la Jesu. Amen.

218 Haeba u... [Khaitseteli o re, “Ke methapo ea ka. Ke...?...” —Mohl.] Uh-huh. Lumela ka pelo ea hau eohle, 'me u—u...?... Ho lokile.

Tloo hantle, khaitseteli.

219 Joale, le a bona, ha ke khone ho folisa batho. 'Me Molimo o ke ke oa folisa batho ba sa lumele hore Krete o se a entse hoo. 'Me joale u re... Ke rerile bosiung bona ka ntho eo u ka beang matsoho a hau ho eona. O tla re, “Ke ena.”

220 Joale, le a bona, haeba Jesu A ne a eme mona ka Boeena, A apere sutu ena eo A e behileng pelong ea Moena Williams ho mpha... Empa, Eena, haeba A—haeba A ne a eme mona a apere sutu ena... U a tseba, ke lumela hore u e file Morena ha a entse seo?

221 Ke ba bakae ba kileng ba bala bophelo ba Santa Martin? E ne e le mohetene, 'me e le lesole. Ntatae o ne a batla hore e be lesole. 'Me o ne a sa batle ho ba joalo. Eena, ntho e 'ngoe ea 'mitsa, ka Molimo.

222 'Me bosiu bo bong, a feta, bosiu bo batang ba mariha, lefupatsela la khale, la batho le ne le robetse seterateng, le hoama le e-shoa. 'Me batho ba feta ba ka beng ba mo thusitse. Ha ba etsa joalo. Martin a tela tsohle tseo a neng a li ruile. Ka baka leo a re, “Ho ka etsoa ho le hong feela. Ke na le jase e le 'ngoe.” Eaba o tsoara sabole ea hae feela, a khethetha kobo, ka lehare, a phuthela lefupatsela ka eona, joalo, 'me a tsamaea le halofo e 'ngoe.

223 Batho ba mo tseha, ba re, “Ke bothoto hakakang! Na ha se lesole le shebehang hantle joale, le apere mokheketso eo baki?” Ha a ka a natsa letho, a tsoella, hoba a tsebile e le seo a tlangang ho se etsa.

224 Bosiu boo ka hara moaho, a phaphama. 'Me hoba a etse, a bona Jesu a eme mono, a phuthetsoe ka mokheketso oo oa jase a phuthetseng lefupatsela ka eona.

225 'Me A retolohela nqa Mangeloi. A re, “Na le tseba ea Mphuthetseng lebakeng lena?”

Ba re, “Che.”

Ho re, “Martin o entse joalo.”

226 Ke moo he. A fetoha mohalaledi, ho bua ka lipuo, le ho leleka matemona, ho bona lipono, moporofeta ea matla oa Molimo. E, monghali. Hobaneng? Eitse ha a phuthela mokopi eo oa khale seterateng, a phuthela Jesu Krete. “Kamoo le entseng ba banyenyane bana ba Ka, le ho entse ho 'Na.”

227 Le ho ikholisa hobane le phuthela ka ho loka ha Krete, ke leka ho le bolella bosiung bona. Hola ke ena le matla a ho le folisa, ke ne ke tla folisa e mong le e mong la lona. Oa bona? Empa ke leka ho le bontša ka neo, seo ke se rerileng, hore Molimo o e netefatsa ho ba joalo, le a bona, hore nke ke ka folisa batho, empa ho le tsebisa hore O teng mona.

228 U lumela seo, mofumahali? Joale ramatiki ea hau e tla u tlohela. U a lumela e tla etsa joalo? Joale u ka ikela 'me u hlabe litlatse, le ho re, “Ho bokoe Morena. Ke lumela ka pelō ea ka eohle.”

229 Ebile ntho e makatsang ha ke itse, “ramatiki,” ho eena, 'me u ne u e-na le ntho eona eo. Tsoella feela, ho re, “Ke lumela ka pelo eohle ea ka,” 'me u tsamaee feela. E tla etsoa.

230 Joale na u lumela Molimo a tla folisa mala a hau, 'me u ee hae u je kamoo u tšoanetseng? Joale tsoela pele u ee hae u je kamoo u loketseng.

231 Lumela joale. U lumela ka pelō eohle ea hau? “Ha Nka—ha Nka nyolloa lefatšeng, Ke tla hulela batho bohle ho 'Na.”

232 Joale, na le a lumela Moea o Halalelang o teng mona? Ha nka u bea matsoho feela, u—u ne u tla fola?

Ka Lebitso la Jesu, a ke a fole.

233 “Mehlolo e tla tsamaea le ba lumelang ke eona ena ka Lebitso la Ka.” Joale, le lumele feela joale ha le feta.

Tloo hantle, khaitseli.

Ka Lebitso la Jesu Krete!

234 E mong le e mong a rapele joale. Le a bona, lipono tse ngata tseo li a nkatla, le a bona. Le a bona?

Ka Lebitso la Jesu, ke U rapela ho folisa khaitseli ea rōna.

235 Ke u bone u phahamisa letsoho la hau mono, hore u a lumela. Lumela joale.

Ka Lebitso la Jesu Krete, ke rapela hore U tla mo folisa.

Tloo, khaitseli.

236 Ntate Molimo, ke tla ke le feela matsohong a ka. Ke mpa ke itšoarella sefapanong sa Hau. Ke kopa pholiso ea hae, ka Lebitso la Jesu. Amen.

237 Ntate Molimo, ka Lebitso la Jesu Krete, khaitseli ea rōna a fole. Amen.

Tloo, moena oa ka ea ratehang.

Ka Lebitso la Jesu Krete, moena oa ka a fole.

238 U a lumela Molimo o tla folisa a mo phekole?

Ka Lebitso la Jesu Krete, ngoana enoa a fole.

Joale shebang feela, a sa rapelloa joale.

Ka Lebitso la Jesu Krete, khaitsemi ea rōna a fole.

Ka Lebitso la Morena Jesu, khaitsemi ea rōna a fole.

Ka Lebitso la Morena Jesu, khaitsemi ea rōna a fole.

Ka Lebitso la Jesu Krete, moena oa rōna a fole.

Ka Lebitso la Jesu Krete, khaitsemi ea ka a fole.

Joale, lulang thapelong, e mong le e mong, ka khutso ea ruri, thapelong.

Ka Lebitso la Jesu Krete, khaitsemi ea rōna a fole.

Oho Molimo, buseletsa ho ngoanana enoa seo Satane a se nkileng.

Tsoa ho eèna, Satane! . . . ? . . .

Ka Lebitso la Jesu Krete, moena oa rōna a fole.

Ka Lebitso la Jesu Krete, khaitsemi ea rōna a fole.

Ka Lebitso la Jesu Krete, khaitsemi ea rōna a fole.

Ka Lebitso la Jesu Krete, khaitsemi ea rōna a fole.

Ka Lebitso la Morena Jesu, khaitsemi ea rōna . . . ? . . .

Ka Lebitso la Morena Jesu, khaitsemi ea rōna . . . ? . . .

Ka Lebitso la Jesu Krete, a rona . . . ? . . .

239 Joale, hara letšoele, bohle. Ke a tseba ha a fumana litlankana tsa thapelo tse lekaneng kantle mono. Ke batla le inamise hlooho tsa lona, nakoana feela. Ke batla ho le botsa potso.

240 Lemo tse likete tse peli tse fetileng ho hlahile Monna. Likete tse 'ne, yaa, lilemo tse ka bang makholo a mashome a mabeli a metso e mehlano tse fetileng, ho bile le . . . Molimo oa theoaha, oa bonahatsoa ka ho Monna, le ho lula e—e sefateng sa eike sa Abraham. Oa furalla lerako, kapa tente, oa bolella Sara bothata, ka hare. Jesu o itse, “Joaloka letsatsing leo, ho tla ba joalo ho tlang ha Mora motho.”

241 Jesu e ne e le moemeli oa Molimo. “Mesebetsi eo Ke e etsang le tla e etsa le lona.” Re a e bona. Ke nnete, ntle le pelaelo.

242 Joale, lebaka leo ke sa kang ka tsoelapele, ke tšoare likopano tse ngata hakana. Ke tla khutlela Phoenix ka tsatsi le leng, ka kopano e kholo, ha Morena a ratile.

243 Joale, ho lona mona bosiung bona ba kulang le ba hlohang, 'me le sa fumana setlankana sa thapelo, ho tla aletareng, holimo mona ho rapelloa, ke tlil'o le rapella joale. Ke batla le be le hlomphe e tiileng.

²⁴⁴ Ke batla e mong le e mong oa lona balumeli le beane matsoho holima, e le e—e le pontšo. Joale, Bibeletse, joale, 'ona Molimo ona o entseng tšepiso ena, o boletse sena, “Mehlolo e tla tsamaea le ba lumelang ke eona ena. Ha ba bea matsoho a bona holima bakuli, ba tla fola.” Molumeli ofe, molumeli ofe ea nang le Moea o Halalelang, u na le matla a Molimo kahare ho uena, kapa bolaoli, ho rapela thapelo ea tumelo. Ke batla hore le rapele ha ke ntse ke rapella batho bana.

²⁴⁵ Ntata rona ea Maholimong, re thabile bosiuung bona. Ho rera Lentsoe, le ho bona Molimo o theoha o thasisetsa Lentsoe, ka hona seo—seo ke seemahale seo U se tšepisitseng.

²⁴⁶ Ka tsatsi le leng, khale koana, ho kile ha ba le moshanyana ea bitsoang Davida. O ne a alositse manku a ntatae. A laeloa ho lisa manku ana, ho thibela sera. A batla a se na ho kaalo ho itšireletsa, e le letjeketjane le lenyenyane feela. Empa ka tsatsi le leng tau ea kena lihahlong, 'me ea ntša e 'ngoe ea likonyana. Davida, ka ho ba molisa oa sebele, o ne a batlile ho boloka nku ea ntate eo. A tseba hobane tau e ne e utsoa nku eo, 'me e tla harola nku, le nku e le ea ntatae. O ile a sala tau morao ka sebetehali. A akhela lejoana, 'me a liha tau fatše. 'Me a bolaea tau, 'me a busetsa nku mohlapeng.

²⁴⁷ Joale, Molimo, re balisa ba Hau. Ha re banna ba sehang ka thipa kapa ba—ba kalafo ea meriana. Re tšoare nthoana e ikokobelitseng haholo, letjeketjane. Empa ke seo U se kentseng letsohong la rōna, letjeketjane la thapelo. Sera se kene 'me se tšoare linku tsa Molimo. Se tšoare bontate, le bomme, le bana, se ba hulanya joale hara lihlahla; mehopolo e holofetseng, le lifofu, le ba jeloeng ke mofetše, le matemona.

²⁴⁸ Satane, letjeketjane lena la thapelo le bonahala le nyatseha haholo, empa ke tseba seo le tla se etsa. Ke sala nku eo morao bosiuung bona, ho e khutlisa. Tsoa. Mo tlohele. Tsoa ho motho eo, uena moea o mobe oa maloetse, 'me u mo tlohele. Ke u laela, ka Lebitso la Jesu Krete, tloha, 'me u se hlole u khutlela ho bona. A Molimo oa Leholimo a u khaleme, Satane.

²⁴⁹ Jesu oa Nazareth a itse, “Ha u ka re ho thaba ena, ‘Sutha,’ 'me u sa belaele pelong ea hau, empa u lumele seo u se buileng, seo u se buileng se tla phethahala.” Ka baka leo, ka Lebitso la Jesu Krete, ke bolela tokoloho ho e mong le e mong mona. Ka . . .

²⁵⁰ Satane, u ka re ha re na boholo ba ho etsa sena. Re u phahamiselitse Seemahale bosiuung bona, Jesu Krete. Moea o Halalelang o teng mona, ho paka hore sena ke Seemahale sa Molimo, 'me u lahlehetsoe ke nto. Tsoa, ka Lebitso la Jesu Krete. 

62-0119 Seemahale
Jesus Name Church
Phoenix, Arizona U.S.A.

SOUTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org